

PURMERU LIBRU DI KRONIKAS

Introduson

Kronikas signifika relatorius ku skirbidu di kusas ku kontisi. 1 ku 2 Kronikas seduba un libru son, ligadu tambi ku Esdras ku Neemias. Judeus ta falaba sempri kuma i Esdras ku skirbi e librus. I pudiba konsulta utru librus ki tenba, suma libru di reŝistu di rei Davi (1 Kron 27.24), librus di Storia di Anunsiaduris Samuel, Natan ku Gad (1 Kron 29.29), Storia di Anunsiadur Natan, Anunsius di Aias di Siló ku Visons di Anunsiadur Idu (2 Kron 9.29), Storias di Anunsiaduris Semaías ku Idu (2 Kron 12.15; 13.22), Apontamentus di Jeu ku sta na libru di Storias di Reis di Israel (2 Kron 20.34; 24.27), libru ku Isaias skirbi aserka di Uzias (2 Kron 26.22), Vison di Anunsiadur Isaias ku libru di Storia di Reis di Judá ku di Israel (2 Kron 32.32) ku Storia di Anunsiaduris (2 Kron 33.19).

1 Kronikas ta konta manga di kusa ku sta na 2 Samuel, ma i tene novi kapitulu di listas di jorsons, ku kumsa ku Adon, e bai te dipus di judeus riba di katiberasku na Babilonia, pa kumsa un nobu vida na se propi tera. Reŝistus seduba importanti pa elis, pa e sibi di yardansa di kada familia, tambi pa sibi kin ku pudi sedu saserdoti. Jorson di Davi teneba garandi importansia, pabia Deus fala kuma si tronu na sedu firmi, i na ba ta pasa di pape pa fiju pa sempri (Sal 89.3-4). Mas tardi, Mesias (Kristu) bin padidu na ki jorson. E listas na 1 Kron 1—9 pudi ojadu suma skeletu di Beju Testamentu.

Rusumu

1.1—9.44 Listas di jorsons

10.1-14 Mortu di Saul

11.1—29.30 Renansa di Davi

Na kapitulu 22 Davi kumsa purpara pa kumpu templu. I si fiju Salomon ku bin pui tudu na pratika, ma no pudi nota kuma ku Davi fasi planta konformi Deus mostral (28.19), i junta material, tambi i organisa levitas pa e sirbi Deus na templu.

Adon te fijos di Noe

(Kum 5.1-32)

1 ¹Adon, Set, Enos, ²Kenan, Maalalel, Jared, ³Enok, Metuselá, Lamek, ⁴Noe.

Fijos di Noe: Sen, Kan ku Jafé.

Fijos di Jafé

(Kum 10.2-5)

⁵Fijos di Jafé e seduba: Gomer, Magog, Madai, Javan, Tubal, Mesek ku Tiras.

⁶Fijos di Gomer: Askenaz, Rifá ku Togarma.

⁷Fijos di Javan: Elisá, Tarsis, Kintin ku Rodanin.

1.1: Kum 4.25-26; Luk 3.36-38 **1.4:** Kum 6—9; Is 54.9-10; Ez 14.14; Mat 24.37; Eb 11.7; 2 Ped 2.5 **1.5:** Ez 27.13; 38.2-3,6; 39.1 **1.7:** Kum 10.4; Sal 72.10; Is 66.19; Ez 27.12

Fijus di Kan*(Kum 10.6-20)*

⁸Fijus di Kan: Kus, Mizrain, ^a Put ^b ku Kanaan.

⁹Fijus di Kus: Seba, Avilá, Sabtá, Raamá ku Sabteká.

Fijus di Raamá: Sebá ku Dedan.

¹⁰Kus padi Ninrod, ku kumsa na sedu algin di puder na tera.

¹¹Mizrain padi ludeus, anameus, leabeus, naftueus, ¹²patruseus, kas-lueus ku kaftoreus, ku filisteus sai nel.

¹³Kanaan padi si purmeru fiju, Sidon, ku Et, ¹⁴ku jebuseus, amoreus, jirgaseus, ¹⁵eveus, arkeus, sineus, ¹⁶arvadeus, zemareus ku amateus.

Semitas*(Kum 10.21-32; 11.10-26)*

¹⁷Fijus di Sen: Elan, Asur, Arfasad, Lud ku Aran.

Aran padi Uz, Ul, Jeter ku Mesek.

¹⁸Arfasad padi Salá; Salá padi Eber.

¹⁹Eber padi dus fiju; nomi di un i Peleg, pabia na si tempu con rapati-du; nomi di si ermon i Joktan.

²⁰Joktan padi Almodá, Selef, Azarmavé, Jerá, ²¹Adoran, Uzal, Dikla, ²²Ebal, Abimael, Sebá, ²³Ofir, Avilá ku Jobab; esis tudu seduba fijus di Joktan.

²⁴Jorson di Sen te na Abron i asin: Sen, Arfasad, Salá, ²⁵Eber, Peleg, Reú, ²⁶Serug, Naor, Tera ²⁷ku Abron, ku sedu Abraon.

²⁸Fijus di Abraon i Isak ku Ismael.

Jorson di Ismael*(Kum 25.12-16)*

²⁹Ali nomis di fijus di Ismael: Si purmeru fiju i Nebaiot, dipus Kedar,

Adbeel, Mibsan, ³⁰Misma, Dumá, Masá, Adar, Tema, ³¹Jetur, Nafis ku Kedemá. Esis i fijus di Ismael.

Jorson di Ketura*(Kum 25.1-4)*

³²Esis i fijus di Ketura, kumadri di Abraon: Zinran, Joksan, Medan, Midian, Jisbak ku Suá.

Fijus di Joksan i Sebá ku Dedan.

³³Fijus di Midian: Efá, Efer, Enok, Abida ku Elda. Esis tudu i fijus di Ketura.

Jorson di Esaú*(Kum 36.1-19)*

³⁴Abraon padi Isak. Fijus di Isak: Esaú ku Israel.

³⁵Fijus di Esaú: Elifaz, Reuel, Jeus, Jalon ku Koré.

³⁶Fijus di Elifaz: Teman, Omar, Zefi, Gaetan ku Kenaz; tambi i padi un fiju ku Timna comadu Amalek.

³⁷Fijus di Reuel: Naat, Zerá, Samá ku Mizá.

Fijus di Seir*(Kum 36.20-30)*

³⁸Fijus di Seir: Lotan, Sobal, Zibeon, Aná, Dison, Eser ku Disan.

1.7: Num 24.24 ^a **1.8** Mizrain i Ejitu. ^b Put i Libia.

1.10: Mik 5.6 **1.12:** Lei 2.23; Jer 47.4; Am 9.7

1.13: Kum 9.22-27 **1.13:** Kum 15.19-21; 23.3,5,20; 27.46; 49.30-32; Sai 23.28; Lei 7.1; Jos 9.1

1.14: Jos 11.3 **1.14:** Kum 48.22; Sai 3.8,17; 13.5;

Num 21.21-32; Lei 7.1; 20.17; Jos 3.10; 24.15; 2 Sam 21.2; 2 Re 21.11; Ne 9.8; Am 2.9 **1.15:** Sai 3.8,17; 13.5;

1 Re 9.20 **1.17:** Kum 14.1; Is 11.11; 21.2; 22.6; Jer 25.25; Ez 32.24 **1.17:** Num 24.22 **1.17:** Kum 11.31

1.18: Num 24.24 **1.23:** 1 Re 9.28 **1.23:** Kum 2.11

1.26: Luk 3.35 **1.27:** Kum 17.5 **1.28:** Kum 16.11-16; 17.19-21; 21.2-5,9-21 **1.29:** Kum 28.9; Is 60.7

1.32: Šef 6.1-6 **1.32:** Jer 25.23; Ez 25.13; 27.20

1.33: Is 60.6 **1.36:** Jer 49.7,20; Am 1.12; Ob 9; Ab 3.3

³⁹Fijus di Lotan: Ori ku Oman. Irma di Lotan i Timna.

⁴⁰Fijus di Sobal: Alvan, Manaat, Ebal, Sefi ku Onan.

Fijus di Zibeon: Aia ku Aná.

⁴¹Fiju di Aná: Dison. Fijus di Dison: Anran, Esban, Itran ku Keran.

⁴²Fijus di Eser: Bilan, Zaavan ku Jaakan.

Fijus di Disan: Uz ku Aran.

Reis di Edon

(Kum 36.31-43)

⁴³Esis e sedu reis ku renaba na tera di Edon oca ku fijus di Israel ka teneba inda rei:

Belá, fiju di Beor; nomi di si prasa i Dinabá.

⁴⁴Belá muri; Jobab, fiju di Zerá di Bozra, i rena na si lugar.

⁴⁵Jobab bin muri; Usan, di tera di temanitas, i rena na si lugar.

⁴⁶Kontra Usan muri, Adad, fiju di Bedad, ku ngaña midianitas na matu di Moab, i rena na si lugar. Nomi di si prasa i Avit.

⁴⁷Adad bin muri; Samla di Masreka rena na si lugar.

⁴⁸Oca ku Samla muri, Saul di Reobot na Riu i rena na si lugar.

⁴⁹Saul bin muri; Baal-Anan, fiju di Akbor, i rena na si lugar.

⁵⁰Oca ku Baal-Anan muri, Adad rena na si lugar. Nomi di si prasa i Paú. Nomi di si minjer i Meetabel, fiju di Matred, fiju di Mezaab.

⁵¹Dipus di Adad muri, i esis ku bin sedu sêfis na Edon: sêfis Timna, Alva, Jetet, ⁵²Aolíbama, Elá, Pinon, ⁵³Kenaz, Teman, Mibzar, ⁵⁴Magdiel ku Iran. Esis i sêfis di Edon.

Fijus di Israel

2 ¹Esis i fijus di Israel: Ruben, Simeon, Levi, Judá, Isakar, Zebulon, ²Dan, José, Benjamin, Naftali, Gad ku Aser.

Judá

³Fijus di Judá: Er, Onan ku Selá. E tris, se mame seduba fiju di Suá di Kanaan. Er, purmeru fiju di Judá, i mau ba na uju di SIÑOR; pabia di kila, SIÑOR matal. ⁴Tamar, minjer di si fiju, i padi ku el Perez ku Zerá. Asin, juntadu tudu, Judá padi sinku fiju.

⁵Fijus di Perez: Ezron ku Amul.

⁶Fijus di Zerá: Zinri, Etan, Eman, Kalkol ku Darda, ku sedu sinku na tudu.

⁷Akan, fiju di Karmi, tisi mufunesa riba di Israel manera ki furta kusa sagrađu.

⁸Fiju di Etan: Azarias.

⁹Fijus ku Ezron padi: Jerameel, Ran ku Kaleb.

¹⁰Ran padi Aminadab; Aminadab padi Naason ku seduba sêf di fijus di Judá. ¹¹Naason padi Salmon; Salmon padi Boaz; ¹²Boaz padi Obed; Obed padi Jesé; ¹³Jesé padi si purmeru fiju Eliab; si sugundu, Abinadab; terseru, Simeia; ¹⁴kuartu, Netanel; kintu, Radai; ¹⁵sestu, Ozen; setimu, Davi. ¹⁶Se irmas seduba Zerua ku Abigail. Zerua teneba tris fiju ku seduba:

1.39: Lei 2.12,22 1.42: Mis 4.21 1.44: Is 34.6; 63.1; Jer 49.13; Am 1.12 2.1: Kum 32.28; 49.2-28; Sai 1.1-4 2.3: Kum 38.1-10 2.4: Rut 4.12 2.7: Kap 4.1; Jos 7.1 2.10: Num 1.7 2.12: Rut 4.17 2.13: 1 Sam 16.6-9 2.15: 1 Sam 16.12-13 2.16: 1 Sam 26.6

Abisai, Joab ku Asael. ¹⁷ Abigail padi Amasa; pape di Amasa seduba Jeter, un ismaelita.

Jorson di Kaleb

¹⁸ Kaleb, fiju di Ezron, ku si minjer Azuba, e padi un fiju femia comadu Jeriot. Fijus di Jeriot e seduba Jeser, Sobab ku Ardon. ¹⁹ Dipus di mortu di Azuba, Kaleb bin kasa ku Efrata, i padi Ur ku el. ²⁰ Ur padi Uri; Uri padi Bezaleel.

²¹ Oca ku Ezron teneba sesenta anu, i kasa ku fiju di Makir, pape di Jilead; e padi Segub. ²² Segub padi Jair ku bin manda riba di vinti i tris prasa na tera di Jilead. ²³ Jesur ku Aran e toma ki prasas di Jair, ku Kenat ku se tabankas na roda; juntadu e sedu sesenta prasa. Tudu e jinti e seduba di jorson di Makir, pape di Jilead.

²⁴ Dipus di mortu di Ezron na Kaleb di Efrata, si minjer Abia i padi Asur, ku sedu pape di Tekoa.

Jorson di Jerameel, fiju di Ezron

²⁵ Fijus di Jerameel, purmeru fiju di Ezron, e seduba: Ran, si purmeru fiju, Buna, Oren, Ozen ku Aías. ²⁶ Jerameel teneba utru minjer comadu Atara, mame di Onan. ²⁷ Fijus di Ran, purmeru fiju di Jerameel, i esis: Maaz, Jamin ku Eker. ²⁸ Fijus di Onan seduba Samai ku Jada. Samai padi Nadab ku Abisur.

²⁹ Abisur kasa ku Abiail; e padi Aban ku Molid.

³⁰ Fijus di Nadab i Seled ku Apain. Seled muri oca ki ka tene fijus.

³¹ Fiju di Apain i Isi; Isi padi Sesan; Sesan padi Alai.

³² Jada, ermon di Samai, i padi dus fiju ku seduba Jeter ku Jonatas. Jeter muri sin fiju. ³³ Jonatas padi Pelet ku Zaza. Es i jorson di Jerameel.

³⁴ Sesan ka teneba fiju macu, son femias. I teneba un kriadu di Ejitu ku comadu Jará. ³⁵ Sesan da un di si fijus pa i kasa ku Jará, si kriadu; e padi Atai. ³⁶ Se jorson te Elisama i sedu: Atai, Natan, Zabad, ³⁷ Eflal, Obed, ³⁸ Jeu, Azarias, ³⁹ Elez, Eleasá, ⁴⁰ Sismai, Salun, ⁴¹ Jekamias ku Elisama.

Utru familias di Kaleb

⁴² Purmeru fiju di Kaleb, ermon di Jerameel, i Mesa, pape di Zif, ku padi Maresa, pape di Ebron.

⁴³ Fijus di Ebron i Koré, Tapua, Reken ku Sema. ⁴⁴ Sema padi Raon, pape di Jorkean. Reken padi Samai. ⁴⁵ Samai padi Maon ku sedu pape di Bet-Zur. ⁴⁶ Efá, kumadri di Kaleb, i padi Aran, Moza ku Gazez. Aran tambi i padi un fiju comadu Gazez.

⁴⁷ Jadai padi Rejen, Jotan, Jesan, Pelet, Efá ku Saaf.

⁴⁸ Kaleb teneba utru kumadri ku comadu Maaka ku padi Seber, Tiraná, ⁴⁹ Saaf, pape di Madmana, ku Seva, pape di Makbena ku Jibeá. Fiju femia di Kaleb i Aksa.

⁵⁰ Fijus di Ur, purmeru fiju ku Kaleb padi ku Efrata, i Sobal, pape di Kiriati-Jearin, ⁵¹ Salma, pape di jinti di Belen, ku Aref, pape di Bet-Gader.

2.17: 2 Sam 17.25 2.20: Sai 31.2 2.21: Num 32.39-42
2.24: 1 Sam 30.14 2.24: 2 Sam 14.2 2.42: Jos 15.24
2.45: Jos 15.58 2.50: Jos 15.60 2.51: Kum 35.19

⁵²Sobal, pape di Kiriati-Jearin, i seduba tamba pape di Aroé ku metadi di menuitas.

⁵³Familias di Kiriati-Jearin e sedu itritas, puteus, sumateus ku misraeus. Zorateus ku estaoleus e sai nelis.

⁵⁴Salma i pape di Belen, di netofatitas, di Atarot-Bet-Joab ku metadi di manaatitas ku zoritas.

⁵⁵Familias di skritoris ku morabana Jabez e seduba tiratitas, simeatitas ku sukatitas. Esis e sedu keneus di jorson di Amat, kabesa di familia di Rekab.

Jorson di Davi

3 ¹Esis i fijus ku Davi padi na prasa di Ebron:

Si purmeru i Amnon,
fiju di Ainoan di Jizreel;
sugundu i Daniel,
fiju di Abigail di Karmelu;

² terseru, Absalon,
fiju di Maaka, fiju femia
di Talmai, rei di Jesur;
kuartu, Adonias, fiju di Ajit;

³ kintu, Sefatias, fiju di Abital;
sestu, Itrean,
fiju di si minjer Eglá.

⁴Ki seis e padidu na Ebron, nunde ki rena seti anu ku seis mis. Dipus i rena trinta i tris anu na Jerusalem, ⁵nunde ki bin padi mas

utru fijus. Bateseba, fiju di Amiel, i padi kuaru fiju ku el, ku sedu Simeia, Sobab, Natan ku Salomon. ⁶Davi teneba mas novi fiju ku sedu: Ibar, Elisama, Elifelet, ⁷Nogá, Nefeg, Jafia, ⁸Elisama, Eliada ku Elifelet. ⁹Esis tudu i fijus di Davi, fora di fijus di si kumadris, ku Tamar, si fiju femia.

Reis di Judá

¹⁰Es i jinti di jorson di Salomon, di pape pa fiju: Reoboan, Abias, Asa, Jeosafá, ¹¹Jeoran, Akazias, Joás, ¹²Amazias, Uzias, Jotan, ¹³Akaz, Ezekias, Manasés, ¹⁴Amon ku Josias. ¹⁵Josias padi kuaru fiju: Joanan, Jeoiakin, Zedekias ku Salun. ^a ¹⁶Jeoiakin padi Jekonias ku Zedekias.

Jorson di Jekonias (Joakin o Konias)

¹⁷Jekonias, ku lebadu katibu, i padi Sealtiel, ¹⁸Malkiran, Pedaias, Senazar, Jekamias, Osama ku Nedabias. ¹⁹Pedaias padi Zorobabel ku Simeia. Zorobabel padi Mesulan ku Ananias, ku se irma Selomit, ²⁰ku mas sinku fiju: Asubá, Oel, Berekias, Asadias ku Jusab-Eded.

²¹Ananias padi Pelatias ku Jesaias. Jesaias padi Refaias, pape di Arnan; Arnan padi Obadias, pape di Sekanias. ²²Sekanias padi un fiju, Semaias; Semaias padi Atus, Igal, Barriá, Nearias ku Safat. ²³Nearias padi tris fiju ku sedu: Elioenai, Ezekias ku Azrikan. ²⁴Elioenai padi seti fiju ku sedu: Odavias, Eliasib, Pelaias, Akub, Joanan, Delaias ku Anani.

2.53: Kap 11.40; 2 Sam 23.38 2.53: Jos 19.41

2.54: Kap 9.16; 11.30; 2 Sam 23.29; Esd 2.22; Ne 12.28;

Jer 40.8 2.55: 2 Re 10.15 3.1: 2 Sam 3.2-5

3.4: 2 Sam 2.11; 5.4-5 3.5: 2 Sam 5.14-16; 11.3

3.9: 2 Sam 13.1-20 3.10: 1 Re 12.1; 15.1,8,24

3.11: 2 Re 8.16,24; 12.1 3.12: 2 Re 14.1; 15.1,32

3.13: 2 Re 16.1; 18.1; 21.1,19; 22.1 3.15: 2 Re 23.31,36;

24.8,18; 2 Kron 36.9; Jer 22.11 ^a 3.15 Salun o Jeoakaz

(2 Re 23.30) 3.19: Esd 2.2; 3.2,8; 5.2; Mat 1.12-13

3.22: Esd 8.2

Jorson di Judá

4¹Jinti di jorson di Judá: Perez, Ezron, Karmi, Ur ku Sobal.
²Reaias, fiju di Sobal, i padi Jaat; Jaat padi Aumai ku Laad. Esis i familias di zoratitas.

³Fijus di Etan i Jizreel, Isma ku Idbas; nomi di se irma i Azelelponi.
⁴I padi tambi Penuel, pape di Jedor, ku Ezer, pape di Usá. Esis tudu e seduba di jorson di Ur, purmeru fiju ku Efrata padi ku Kaleb. El ku sedu pape di Belen.

⁵Asur, pape di Tekoa, i teneba dus minjer: Ela ku Naará. ⁶Esis i fijus ku Naará padi: Auzan, Efer, Temeni ku Astari. ⁷Ela padi Zeret, Izar ku Etnan.

⁸Koz padi Anub ku Zobeba, ku familias di Arel, fiju di Arun.

⁹I tenba un omi comadu Jabez ku mas rispita duba di ki si ermons. Si mame pul ki nomi di Jabez^a pabia i padil ku garandi dur. ¹⁰Jabez coma Deus di Israel i falal: “N misti pa bu bensuan ciu, bu burin mas terenu, pa bu mon sta riba di mi pa libran di tudu mal ku pudi fasin sinti dur.” Deus seta kusa ku Jabez pidi.

¹¹Kelub, ermon di Suá, i padi Meir ku sedu pape di Eston. ¹²Eston padi Bet-Rafa, Paseia ku Teina, pape di Ir-Naas. Esis i omis di prasa di Reka.

¹³Fijus di Kenaz i Otniel ku Seraias. Otniel padi Atat ku Meonotai. ¹⁴Meonotai padi Ofra; Seraias padi Joab, ku sedu pape di jinti di kobon di artistas. Ki kau dadu e nomi pabia jinti di la e tenba jitu na kumpu kusas bonitu.

¹⁵Fijus di Kaleb, fiju di Jefoné, i Iru, Elá ku Naan. Elá padi Kenaz.

¹⁶Fijus di Jealelel i Zif, Zifa, Tiria ku Asareel.

¹⁷⁻¹⁸Fijus di Ezra i Jeter, Mered, Efer ku Jalon. Mered kasa ku Bitia, fiju di Faraó, ku padi Mirian, Samai ku Isbá, pape di Estemoa. Si minjer di Judá padi Jered, pape di Jedor, Eber, pape di Sokó, ku Jekutiel, pape di Zanoa.

¹⁹Irma di Naan kasa ku Odias; e padi Abikeila di familia garmita, ku Estemoa di familia maakatita.

²⁰Fijus di Simon i Amon, Rina, Ben-Anan ku Tilon. Fijus di Isi i Zoet ku Ben-Zoet.

²¹Fijus di Selá, fiju di Judá: Er, pape di Leka, ku Lada, pape di Maresa. I seduba tambi pape di familias ku ta tarbaja ku liñu na kasa di Asbeia. ²²Utrus di si jorson i Jokin, ku omis di Kozeba, ku Joás, Saraf (ku ta mandaba riba di moabititas), ku Jasub-Leen. (E kusas li e tiradu na reżistus di antigu.) ²³Ki jinti seduba kumpuduris di puti, e ta staba tambi na ortas ku jardins; e ta tarbajaba pa rei.

Jorson di Simeon

²⁴Fijus di Simeon: Nemuel, Jamin, Jarib, Zerá ku Saul. ²⁵Saul padi Salun; Salun padi Mibsan; Mibsan padi Misma, ²⁶ku sedu pape di Amuel. Amuel padi Zakur, pape di Simeí. ²⁷Simeí padi disaseis fiju macu ku mas seis fiju femia, ma si

4.1: Kap 2.3-23 ^a 4.9 Jabez parsi ku palabra ebraiku pa dur.

4.13: Šef 3.9 4.14: Ne 11.35 4.15: Num 13.6

4.21: Kap 2.3; Kum 38.5; 46.12

ermans e ka teneba manga di fiju. Tudu se jorson i ka bin ciu suma jorson di Judá.

²⁸E moraba ne prasas: Berseba, Molada, Azar-Sual, ²⁹Bila, Ezen, Tolad, ³⁰Betuel, Orma, Ziklag, ³¹Bet-Markabot, Azar-Susin, Bet-Biri ku Saarain. Esis i se prasas te na tempu ku Davi renaba. ³²E moraba tamba na sinku prasa pikininu, ku sedu Etan, Ain, Rimon, Token ku Asan, ³³ku tudu tabankas ku staba na se roda, te na Baal. Es i reżistu di se jorson ku kau ke moraba nel.

³⁴⁻³⁸Es i reżistu di nomis di šefis di se familias: Mesobab, Janlek, Josa, fiju di Amazias, Joel, Jeu, fiju di Josibias, fiju di Seraias, fiju di Asiel, ku Elioenai, Jaakobá, Jesoaias, Asaias, Adiel, Jesimiel, Benaia, ku Ziza, fiju di Sif, fiju di Alon, fiju di Jedaias, fiju di Sinil, fiju di Semaias.

Se familias bin aumenta tok e ciu. ³⁹E ciga te na entrada di Jedor, na ladu di kobon pa saida di sol, pa buska paja pa se karnel. ⁴⁰E bin oja paja ciu na un kau largu, susegadu, diskansadu, nunde ku jorson di Kan moraba antis.

⁴¹Na tempu di Ezekias, rei di Judá, e jinti ku se nomis skirbidu ja e ataka moradias di jinti ke ojaba la na ki kau, e kaba ku elis tudu, suma ku no pudi oja aos; e rabida e mora na se lugar, pabia i ten paja bonitu la pa se karnel. ⁴²Tamba kiñentus omi di jorson

di Simeon e sai e bai pa montañas di Seir. Kilis ku bai dianti e seduba Pelatias, Nearias, Refaias ku Uziel, fijos di Isi. ⁴³E mata restu di amalekitas ku kapliba, e mora la te aos.

Jorson di Ruben

5 ¹Ruben i seduba purmeru fiju di Jakó ma, suma i bin dita ku minjer di si pape, si diritu di purmeru fiju i pasantadu pa fijos di José, fiju di Israel. Pabia di kila, si jorson ka ta kontadu suma jorson di purmeru fiju. ²Judá bin sedu mas forti na metadi di si ermans, tok renansa sai na si jorson, ma diritu di purmeru fiju i seduba di José.

³Fijos di Ruben, purmeru fiju di Israel, seduba: Enok, Palú, Ezron ku Karmi.

⁴⁻⁶Es i lista di jorson di Joel, di pape pa fiju: Joel, Semaias, Gog, Simeil, Mika, Reaias, Baal ku Beera, šef di rubenitas, ku Tiglat-Pileser, rei di Asiria, prindi i leba.

⁷Konformi reżistu, lista di šefis di familia di Ruben i sedu: Jeiel, Zakarias, ⁸Belá, fiju di Azaz, fiju di Sema, fiju di Joel, ku mora na Aroer te na Nebu ku Baal-Meon. ⁹Manera ke bin tene limarias ciu na tera di Jilead, e distindi se moradias pa saida di sol, te na entrada di lala ku ta bai te na riu Eufrates. ¹⁰Na tempu di rei Saul e geria ku agarenu, e ngaña elis, e mora na se tendas na tudu ki reżion di lesti di Jilead.

Jorson di Gad

¹¹Fijos di Gad moraba pertu delis na tera di Basan te na Salka. ¹²Joel

4.28: Kum 21.31 4.30: Num 14.45; Jos 15.30-31

4.43: Sai 17.14 5.1: Kum 29.32; 35.22; 46.8; 48.22;

49.3-4 5.2: Kum 29.35; 46.12; 49.8-10; Num 2.3,9; 7.12;

26.19-22; Šef 1.1-2 5.2: 1 Sam 16.1,13; Sal 78.68-71;

Jer 23.5-6; Mik 5.2; Mat 2.6 5.11: Kum 30.11; 46.16;

Num 26.15-18; 32.34-36; Jos 13.11,24-28

seduba šef na Basan; Sofan seduba sugundu šef, dipus Janai ku Safat. ¹³Se ermons, konformi jorsons di se papes, seduba seti: Mikael, Mesulan, Seba, Jorai, Jakan, Zia ku Eber. ¹⁴Esis i fijus di Abiail, fiju di Uri, fiju di Jaroa, fiju di Jilead, fiju di Mikael, fiju di Jesisai, fiju di Jardu, fiju di Buz. ¹⁵Ai, fiju di Abdiel, fiju di Guni, i seduba se šef. ¹⁶E moraba na Jilead na tera di Basan, ku na tabankas na roda, suma tambi na tudu se kau di bakia di Saron te na se frontera. ¹⁷Tudu ki jinti e režistadu konformi se jorsons, na tempu di Jotan, rei di Judá, ku Jero-boan, rei di Israel.

Gera di jorsons di utru banda di Jordon

¹⁸Jorsons di Ruben ku Gad ku metadi di jorson di Manasés e teneba 44.760 omi forti ku sibiba pega tajadera ku spada, ku teneba jitu pa usa mansasa, ku trenadu pa sai pa gera. ¹⁹E bai geria ku agare-nus, suma tambi ku Jetur, Nafis ku Nodab. ²⁰E coma Deus na gera, e fiansa nel; Deus obi elis, i juda elis pa e ngaña vitoria riba di agare-nus ku tudu ki jinti ku juntaba ku elis. ²¹E leba sinkuenta mil kamelu, du-zentus i sinkuenta mil karnel, dus mil buru ku sen mil omi. ²²Manga di jinti matadu, pabia ki gera i seduba di Deus. E bai mora na se tera te na dia ke lebadu katibu.

Metadi di jorson di Manasés

²³Metadi di jorson di Manasés moraba na ki tera. E bin ciu, e

distindi se kau di mora desdi Basan te na Baal-Ermon, Senir ku monti di Ermon. ²⁴Esis i šefis di se familias: Efer, Isi, Eliel, Azriel, Jeremias, Odavias ku Jadiel; e seduba omis famosu di gera.

²⁵E bin ka sedu fiel pa Deus di se papes, e bai tras di deusis di jinti di ki tera ku Deus kababa ku elis oca ku fijus di Israel yentra pa toma tera. ²⁶Pabia di kila, Deus di Israel cuci spiritu di Pul, ku tene tambi nomi di Tiglat-Pileser, rei di Asiria. Kila bai leba jorsons di Ruben ku Gad, ku metadi di jorson di Manasés, pa katiberasku, i poi elis na Ala, na Abor, na Ara ku lungu di riu di Gozan, nunde ke sta te aos.

Jorson di šefis di saserdoti

6 ¹Fijus di Levi: Jerson, Koat ku Merari.

²Fijus di Koat: Anran, Izar, Ebron ku Uziel.

³Fijus di Anran: Aron, Moisés ku Mirian.

Fijus di Aron: Nadab, Abiu, Eleazar ku Itamar.

⁴Jorson di Eleazar, di pape pa fiju, seduba: Eleazar, Fineias, Abisua, ⁵Buki, Uzi, ⁶Zeraias, Meraiot, ⁷Amarias, Aitub, ⁸Zadok, Aimaaz, ⁹Azarias, Joanan, ¹⁰Azarias (ku seduba šef di saserdotis na templu

5.16: Kap 27.29; Kan 2.1; Is 35.2; 65.10 5.17: 2 Re 14.23;

15.32 5.18: Jos 4.12-13 5.19: Kap 1.31; Kum 25.15

5.22: 2 Re 15.29 5.23: Jos 13.29-31 5.23: Lei 3.8-9

5.25: 2 Re 17.7-17 5.26; 2 Re 15.19,29; 18.11

6.1: Kum 46.11; Sai 6.16-25; Num 3.17; 26.57

6.3: Sai 2.4-8; 15.20-21; Num 12; Mik 6.4 6.3: Sir 10.1-2

6.4: Jos 24.33 6.4; Num 25.6-13; 31.6; Esd 7.5

6.7: 2 Sam 8.17; 15.24,27,36; 17.17-20; 18.19-20

ku Salomon kumpu na Jerusalem),
 11 Amarias, Aitub, 12 Zadok, Salun,
 13 Ilkias, Azarias, 14 Seraias ku Jeozadak
 15 ku lebadu katibu oca ku SIÑOR leba Judá ku Jerusalem prezu na mon di Nabukodonosor.

Utru familias di Levi

16 Fijus di Levi: Jerson, Koat ku Merari.

17 Nomis di fijus di Jerson: Libni ku Simeï.

18 Nomis di fijus di Koat: Anran, Izar, Ebron ku Uziel.

19 Nomis di fijus di Merari: Mali ku Musi.

Es i jorson di levitas, konformi familias di se papes:

20 Di Jerson: Libni, Jaat, Zima, 21 Joá, Idu, Zerá ku Jeaterai.

22 Di Koat: Aminadab, Koré, Asir, 23 Elkana, Ebiasaf, Asir, 24 Taat, Uriel, Uzias ku Saul.

25 Fijus di Elkana: Amasai ku Aimot.

26 Jorson di Aimot: Elkana, Zofai, Naat, 27 Eliab, Jeroan ku Elkana.

28 Samuel teneba dus fijus: purmeru, Joel, ku sugundu, Abias.

29 Jorson di Merari: Mali, Libni, Simeï, Uzá, 30 Simeia, Ajas ku Asaias.

6.13: 2 Re 22.4 6.14: 2 Re 25.18; Esd 5.2; A¿eu 1.1

6.17: Num 3.18,21 6.19: V 47; Kap 23.21; 24.26;

Num 3.20 6.27: 1 Sam 1.1 6.28: 1 Sam 8.2

6.31: Kap 15.16-22,27; 16.41-42; 25; 1 Re 10.12;

2 Kron 5.12-13; 20.19-21; 29.25-30; 31.2; Sal 87.7; Am 6.5

6.31: Kap 16.1 6.32: Kap 9.33; 16.4-6,37-42

6.32: Kap 25.7-31 6.33: V 28; Kap 15.17,19

6.37: Num 16.1 6.39: Kap 16.7; 25.1-2; 26.1; 2 Kron 5.12;

20.14; 29.13,30; 35.15; Esd 2.41; Ne 11.17,22; 12.35,46

6.47: V 19; Num 3.35-36; Jos 21.7,34-40

6.49: Sai 30.7; Sir 1.5-9

Kantaduris di templu

31 Esis i jinti ku Davi nkarga di musika na kasa di SIÑOR dipus ku arka pudu la. 32 E ta sirbiba ku kantiga dianti di tenda di juntamentu te na tempu ku rei Salomon kumpu kasa di SIÑOR na Jerusalem. E ta fasiba e tarbaju konformi se skala.

33 Kil ku ta sirbiba di jorson di Koat i Eman, kantadur, fijus di Joel, fijus di Samuel, 34 fijus di Elkana, fijus di Jeroan, fijus di Eliel, fijus di Toá, 35 fijus di Zuf, fijus di Elkana, fijus di Maat, fijus di Amasai, 36 fijus di Elkana, fijus di Joel, fijus di Azarias, fijus di Sofonias, 37 fijus di Taat, fijus di Asir, fijus di Ebiasaf, fijus di Koré, 38 fijus di Izar, fijus di Koat, fijus di Levi, fijus di Israel.

39 Si ermon Asaf staba na si dreita. Asaf i fijus di Berekias, fijus di Simeia, 40 fijus di Mikael, fijus di Baaseias, fijus di Malkias, 41 fijus di Etni, fijus di Zerá, fijus di Adaias, 42 fijus di Etan, fijus di Zima, fijus di Simeï, 43 fijus di Jaat, fijus di Jerson, fijus di Levi.

44 Na si skerda i staba si ermon Etan, di fijus di Merari. Si jorson i bai pa tras te na Levi de manera: Etan, Kisi, Abdi, Maluk, 45 Asabias, Amazias, Ilkias, 46 Anzi, Bani, Semer, 47 Mali, Musi, Merari, Levi.

48 Se ermons levitas e dadu kargu di sirvis di tenda ku sedu kasa di Deus.

Jorson di Aron

49 Aron ku si fijus e ta pursentaba limarias di sakrifisiu riba di altar di oferta kemadu, e ta kema nsensu riba di altar di nsensu. E ta fasiba tudu sirvis di kau mas

sagradu, ku sakrifisius pa purdon di pekadu di Israel, konformi tudu ordi ku Moisés, servu di Deus, daba elis. ⁵⁰Es i jorson di Aron, di pape pa fiju: Aron, Eleazar, Fineias, Abisua, ⁵¹Buki, Uzi, Zeraias, ⁵²Meraiot, Amarias, Aitub, ⁵³Zadok ku Aimaaz.

Moransas di levitas

⁵⁴Es i terenu ku kau ku dadu pa levitas mora nel. Purmeru sorti kai pa familia di Aron, di jorson di Koat. ⁵⁵E dadu Ebron na con di Judá, ku kau di bakia na roda del, ⁵⁶ma terenu ku tabankas ku fasiba parti di prasa e dadu pa Kaleb, fiju di Jefoné.

⁵⁷Jorson di Aron dadu Ebron (ku sedu prasa di rogu), Libna, Jatir, Estemoa, ⁵⁸Ilen, Debir, ⁵⁹Asan, Jutá ku Bet-Semes, tudu ku se kau di bakia na roda. ⁶⁰Di jorson di Benjamin e dadu Jibeon, Jeba, Alemet ku Anatot, tudu ku se kau di bakia na roda. Asin i dadu trezi prasa pa familias di Koat. ⁶¹Metadi di jorson di Manasés e da des prasa pa sorti pa restu di familias di Koat.

⁶²Fijus di Jerson, konformi se familias, e risibi trezi prasa di jorsons di Isakar, Aser, Naftali ku di ki metadi di Manasés ku sta na Basan.

⁶³Jorson di Merari, konformi se familias, pa sorti e risibi dozi prasa di jorsons di Ruben, Gad ku Zebulon.

⁶⁴Asin fijus di Israel da levitas ki prasas ku se kau di bakia. ⁶⁵Ki prasas ku se nomis comadu ja, ku jorsons di Judá, Simeon ku Benjamin da elis, e juga sorti pa rapati elis.

⁶⁶Utru familias di jorson di Koat e dadu prasas di jorson di Efrain: ⁶⁷Siken, un prasa di rogu na montañas di Efrain, Jezer, ⁶⁸Jokmean, Bet-Oron, ⁶⁹Aijalon ku Gat-Rimon, tudu ku kau di bakia na se roda.

⁷⁰Di metadi di jorson di Manasés, utru familias di jorson di Koat e dadu Aner ku Bilean, ku kau di bakia na se roda.

⁷¹Fijus di Jerson risibi utru prasas, tudu ku se kau di bakia na roda:

Di metadi di jorson di Manasés: Golan, ku sta na Basan, ku Astarot.

⁷²Di jorson di Isakar: Kedes, Daberat, ⁷³Ramot ku Anen.

⁷⁴Di jorson di Aser: Masal, Abdon, ⁷⁵Ukok ku Reob.

⁷⁶Di jorson di Naftali: Kedes ku sta na Galileia, Amon ku Kiriatain.

⁷⁷Restu di jorson di Merari e dadu prasas tudu ku se kau di bakia:

Di jorson di Zebulon: Rimonu ku Tabor.

⁷⁸Di jorson di Ruben, na utru banda di Jordon pa saida di sol, filadu ku Jerikó: Bezer ku sta na lala, Jaaza, ⁷⁹Kedemot ku Mefaat.

⁸⁰Di jorson di Gad: Ramot ku sta na Jilead, Maanain, ⁸¹Esbon ku Jazer.

Jorson di Isakar

7 ¹Isakar teneba kuaru fiju: Tola, Pua, Jasub ku Sinron.

²Fijus di Tola: Uzi, Refaias, Jeriel, Jamai, Ibsan ku Samuel. Elis e seduba sêfis di familia di jorson di Tola, omis forti na gera na ki tempu. Se numeru na tempu di Davi i cigaba 22.600.

6.54: Num 35.1-8; Jos 21.3-5 6.56: Jos 14; 20; 21.1-42
7.1: Kum 30.18; 46.13; Num 26.23-25

³Uzi teneba un fiju comadu Izraias. Fijus di Izraias seduba Mikael, Obadias, Joel ku Isijá. Elis kuaru ku se pape e seduba sinku šef. ⁴Na se familias e teneba 36.000 omi di gera, pabia e teneba manga di minjer ku fiju. ⁵Režistu di tudu familias di jorson di Isakar i teneba numeru di 87.000 omi di gera.

Jorson di Benjamin

⁶Benjamin teneba tris fiju: Belá, Beker ku Jediael. ⁷Fijus di Belá: Ezbon, Uzi, Uziel, Jerimot ku Iri. E sinku e seduba šefis di familia, omis forti di gera. Režistu di jorson di Benjamin i teneba numeru di 22.034 omi di gera.

⁸Fijus di Beker: Zemira, Joás, Eliezer, Elioenai, Onri, Jerimot, Abias, Anatot ku Alemet. ⁹Se režistu teneba numeru di šefis di familia ku 20.200 omi di gera.

¹⁰Jediael teneba un fiju comadu Bilan. Fijus di Bilan seduba: Jeus, Benjamin, Eud, Kenaaná, Zetan, Tarsis ku Aisaar. ¹¹Tudu ki fijus di Jediael i šefis di familia. I tenba 17.200 omi forti ku ta saiba pa gera.

¹²Supin ku Upin seduba fijus di Ir; Usin i di jorson di Aer. ^a

Jorson di Naftali

¹³Fijus di Naftali: Jaziel, Guni, Jezer ku Salun. Mame di Naftali i Bila.

7.6: Kap 8; Kum 35.18; 46.21; Num 26.38-41

7.10: Šef 3.15-30 ^a7.12 Aer pudi sedu Dan (Kum 46.23).

7.13: Kum 30.3-8; 46.24-25; Num 26.48-49

7.14: Kum 50.23; Jos 17.1 7.15: Num 27.1

7.20: Kum 41.52; Num 26.35-36 ^b7.23 Berias parsi ku palabra ebraiku pa kasabi. 7.24: Jos 16.3 7.27: Sai 17.9

Jorson di Manasés

¹⁴Manasés padi un fiju comadu Asriel ku si kumadri di Siria; dipus e bin padi Makir, pape di Jilead. ¹⁵Makir kasa ku un minjer comadu Maaka, irma di Upin ku Supin. Nomi di si sugundu fiju i comadu Zelothead; kila bin padi son fijus femia. ¹⁶Maaka, minjer di Makir, i padi un fiju, i pul nomi di Peres. Si ermon i comadu Seres; fijus di Peres e comadu Ulan ku Raken. ¹⁷Ulan padi Bedan. Esis i fijus di Jilead, fiju di Makir, fiju di Manasés. ¹⁸Si irma, Amoleket, i padi Isod, Abiezer ku Maalá.

¹⁹Fijus di Semida: Aian, Siken, Liki ku Anian.

Jorson di Efrain

²⁰Esis i jorson di Efrain, di pape pa fiju: Sutela, Bered, Taat, Elada, Taat, ²¹Zabad ku Sutela. Efrain padi mas dus fiju ku sedu Ezer ku Elead ma, oca ke bai pa furta limarias na con di Gat, omis di la mata elis. ²²Se pape, Efrain, i cora elis pa manga di tempu; si ermons bin pa konsolal. ²³Dipus i pertu mas si minjer; kila bin preña, i padi un fiju, i pul nomi di Berias ^b pabia kasabi staba na se kasa.

²⁴Fiju femia di Efrain seduba Seerá, ku kumpu prasas di Bet-Oron di riba ku Bet-Oron di bas; tambi i kumpu utru prasa comadu Uzen-Seerá.

²⁵Efrain teneba tambi utru fiju comadu Refa. Jorson di Refa, di pape pa fiju, i seduba: Resef, Tela, Taan, ²⁶Ladan, Amijud, Elisama, ²⁷Nun ku Josué.

²⁸Con ke toma pa sinta nel i seduba Betel ku si tabankas na roda, Naaran na lesti, Jezer na kaida di sol, Siken, te na Azá, tudu e lugaris ku se tabankas na roda. ²⁹Se moransas bai te na frontera di con di Manasés, Bet-Sean, Mejidu, Taanak ku Dor, ku tudu se tabankas na roda. Esis i lugaris nunde ku fijus di José, fiju di Jakó, moraba.

Jorson di Aser

³⁰Fijus di Aser: Imna, Isvá, Isvi, Berias ku se irma Sera.

³¹Fijus di Berias: Eber ku Malkiel ku seduba pape di Birzavit.

³²Eber padi Jaflet, Somer, Otan ku se irma Suá.

³³Fijus di Jaflet: Pasak, Bimal ku Asvat.

³⁴Fijus di Somer: Ai, Roga, Jeubá ku Aran.

³⁵Fijus di si ermon Elen: Zofa, Imna, Seles ku Amal.

³⁶Fijus di Zofa: Suá, Arnefer, Sual, Beri, Inra, ³⁷Bezer, Od, Samá, Silsa, Itran ku Beera.

³⁸Fijus di Jeter: Jefoné, Pispá ku Ara.

³⁹Fijus di Ula: Ará, Aniel ku Rizia.

⁴⁰Esis tudu i fijus di Aser, sêfis di familia, minjor omis di gera, ku staba danti. Na se rezistus, numeru di omis ku pudiba bai gera i 26.000.

Jorson di Benjamin

8 ¹Benjamin padi si purmeru fiju Belá, si sugundu Asbel, dipus Aará, ²Noá ku Rafa, ku fasi sinku.

³Fijus di Belá: Adar, Jera, Abiud, ⁴Abisua, Naaman, Aoá, ⁵Jera, Sefufan ku Uran.

⁶⁻⁷Esis e seduba fijus di Eud: Naaman, Aias ku Jera, sêfis di familia di moraduris di Jeba. Jera, pape di Uzá ku Aiud, i mundanta elis pa Manaat.

⁸⁻⁹Saarain dispidi dus minjer, Usin ku Baara. Dipus, ocal na tera di Moab, el ku si minjer Odes e padi Jobab, Zibia, Mesa, Malkan, ¹⁰Jeuz, Sakias ku Mirma. E fijus seduba sêfis di familia. ¹¹I teneba tambi dus fiju ku Usin, ku seduba Abitub ku Elpaal.

¹²Fijus di Elpaal: Eber, Misan ku Semed. Semed bin kumpu prasas di Onu ku Lod ku se tabankas na roda.

¹³Berias ku Sema seduba sêfis di familia di Aijalon, ku tira moraduris di Gat.

¹⁴⁻¹⁶Fijus di Berias: Aió, Sasak, Jeremot, Zebadias, Arad, Eder, Mikael, Ispa ku Joa.

¹⁷⁻¹⁸Fijus di Elpaal: Zebadias, Mesulan, Izki, Eber, Ismerai, Izlias ku Jobab.

¹⁹⁻²¹Fijus di Simei: Jakin, Zikri, Zabdi, Elienai, Ziletai, Eliel, Adaias, Beraias ku Sinrat.

²²⁻²⁵Fijus di Sasak: Ispan, Eber, Eliel, Abdon, Zikri, Anan, Ananias, Elan, Antotias, Ifdeias ku Penuel.

²⁶⁻²⁷Fijus di Jeroan: Sanserai, Searias, Atalias, Jaareasias, Elias ku Zikri.

²⁸Esis tudu i sêfis di familia na se jorsons, e moraba na Jerusalem.

7.28: Kum 12.8 **7.28:** Jos 10.33; 17.7

7.30: Kum 30.13; 46.17; Num 26.44-47

8.1: Kap 7.6-11 **8.12:** Esd 2.33; Ne 6.2; 7.37; 11.35

Familia di rei Saul

(1 Kron 9.35-44)

²⁹Jeiël funda prasa di Jibeon, i mora la. Nomi di si minjer i Maaka. ³⁰Si purmeru fiju i seduba Abdon; dipus i padi Zur, Kis, Baal, Ner, Nadab, ³¹Jedor, Aion, Zeker ³²ku Miklot ku bin padi Simeia. Esis e moraba na Jerusalem, pertu di se ermons.

³³Ner padi Kis; Kis padi Saul; Saul padi Jonatas, Malkisua, Abinadab ku Es-Baal. ^a

³⁴Jonatas padi Merib-Baal; ^b Merib-Baal padi Mika.

³⁵Fijus di Mika: Piton, Melek, Tareá ku Akaz.

³⁶Akaz padi Jeoda; Jeoda padi Alet, Azmavet ku Zinri. Zinri padi Moza; ³⁷Moza padi Binea ku padi Rafa. Rafa padi Eleasá ku padi Azel.

³⁸Azel padi seis fiju ku tene e nomis: Azrikan, Bokru, Ismael, Searias, Obadias ku Anan. ³⁹Esek, ermon di Azel, i padi tris fiju: Ulan, Jeus ku Elifelet. ⁴⁰Fijus di Ulan e seduba omis di fama ku ten koražen, ku tenba jitu na manda fleša. E teneba manga di fiju ku netu. Elis tudu i sentu i sinkuenta.

Tudu e jinti seduba di jorson di Benjamin.

Kilis ku riba di katiberasku pa Jerusalem

9 ¹Tudu Israel reżistadu na libru di reis di Israel.

Pobu di Judá lebadu prezu pa Babilonia pabia di se pekadu.

²Purmeru jinti ku riba pa mora na se propi terenu o na se prasas e seduba utru israelitas, saserdotis, levitas ku serventis di templu. ³Utru jinti di jorsons di Judá, Benjamin, Efrain ku Manasés e bai mora na Jerusalem, ku sedu esis:

⁴Utai, fiju di Amijud, fiju di Onri, fiju di Inri, fiju di Bani, di familia di Perez, fiju di Judá;

⁵di silonitas: Asaias, purmeru fiju, ku si fijus;

⁶di fijus di Zerá: Jeuel ku si ermons. Tudu jinti di jorson di Judá i 690.

⁷Di jorson di Benjamin i bai Salu, fiju di Mesulan, fiju di Odavias, fiju di Asenua; ⁸ku Ibneias, fiju di Jeroan; ku Elá, fiju di Uzi, fiju di Mikri; ku Mesulan, fiju di Sefatias, fiju di Reuel, fiju di Ibnijas. ⁹Tudu jinti di jorson di Benjamin, konformi se reżistu, i 956. Tudu ki omis ku se nomis skirbidu li i šefis di familia.

¹⁰Di saserdotis: Jedaias, Jeoiarib, Jakin, ¹¹Azarias, fiju di Ilkias, fiju di Mesulan, fiju di Zadok, fiju di Meraioti fiju di Aitub, šef di kasa di Deus; ¹²Adaias, fiju di Jeroan, fiju di Pasur, fiju di Malkias, ku Maasai, fiju di Adiel, fiju di Jazera, fiju di Mesulan, fiju di Mesilemit, fiju di Imer, ¹³ku se ermons. Numeru di saserdotis ku seduba šefis di familia i 1.760; elis i omis di kapasidadi pa sedu nkargadu di tarbaju di kasa di Deus.

¹⁴Di levitas: Semaias, fiju di Asub, fiju di Azrikan, fiju di Asabias, di jorson di Merari; ¹⁵Bakebakar,

8.29: Kap 9.35-44 **8.33:** 1 Sam 9.1; 14.49-51; 2 Sam 2.8
^a **8.33** Es-Baal o Isboset. ^b **8.34;** Merib-Baal ta comaduba Mefiboset. **8.34:** 2 Sam 4.4 **8.40:** Kap 12.2; 2 Kron 14.8
9.1: 2 Kron 36.20 **9.2:** Jos 9.27 **9.10:** Ne 11.10

Eres, Galal, Matanias, fiju di Mika, fiju di Zikri, fiju di Asaf; ¹⁶Obadias, fiju di Semaias, fiju di Galal, fiju di Jedutun; Berekias, fiju di Asa, fiju di Elkana, ku moraba na tabankas di netofatitas.

¹⁷Porterus: Salun, Akub, Talmon, Aiman, ku se ermons; Salun seduba se šef. ¹⁸Te na ki tempu e pudu pa sedu guardas di porton di rei ku ta fikaba pa ladu di lesti. Esis i jinti ku tiradu na kampamentu di levitas pa sedu porterus.

¹⁹Salun, fiju di Kore, fiju di Ebiasaf, fiju di Koré, ku se ermons di familia di koraitas, e daduba kargu di fasi sirvis di guarda entrada di tenda, suma ku se papes seduba nkargadu di kampamentu di SIÑOR, pa guarda si entrada. ²⁰Finneas, fiju di Eleazar, i ta šefiaba elis; SIÑOR staba ku el. ²¹Zakarias, fiju di Meselemias, i ta guardaba porta di tenda di juntamentu.

²²Na tudu, 212 omi kujidu pa sedu guardas di entradas. E reżistadu konformi se tabankas. Davi ku anunsiadur Samuel, elis ku kumsa kuji jinti pa e kargu di guarda. ²³Elis ku se jorson e fika ku kargu di guarda portons di kasa di SIÑOR, ku seduba tenda na purmeru. ²⁴Porterus e staba na kuartu ladu — lesti, kaida di sol, norti ku sul. ²⁵Se ermons ku moraba na se tabankas e ta binba na tempus markadu pa juda elis na sirvis pa seti dia. ²⁶I tenba kuartu šef di porterus ku seduba levitas, ku tenba kargu di kuartus ku armazens di kasa di Deus. ²⁷Di noti e ta fikaba

na roda di kasa di Deus, pabia i elis ku sedu responsavel pa guardal, tambi pa yabril tudu dia parmaña.

²⁸Utru levitas e tenba konta di vasus pa tarbaju na templu; e ta fasi konta delis ora di yentra ku sai. ²⁹Utrus e toma konta di guarda tudu mobilia ku tudu material sagradu, suma tambi foriña finu, biñu, azeiti, nsensu ku kusas ku ta da bon gustu. ³⁰Jinti responsavel pa jagasi ki kusas sabi seduba utru saserdotis.

³¹Un koraita comadu Matitias, purmeru fiju di Salun, i kujidu na metadi di levitas, i dadu kargu di fasi pon finu di ofertas. ³²Utru ermons di familia di Koat e tenba kargu di purpara pon sagradu ku ta pudu na mesa na templu kada dia di diskansu.

³³Utru levitas, šefis di familia, ku seduba kantaduris, e ta moraba na kuartus di templu; e ka ta fasiba utru sirvis, pabia e staba ja okupadu na ki tarbaju di kanta, di dia ku di noti.

³⁴Tudu e jinti i šefis di familia di levitas, reżistadu suma šefis na se jorson. E moraba na Jerusalen.

Jorson di rei Saul

(1 Kron 8.29-38)

³⁵Jeiel funda prasa di Jibeon, i mora la. Nomi di si minjer i Maaka. ³⁶Si purmeru fiju i seduba Abdon; dipus i padi Zur, Kis, Baal, Ner, Nadab, ³⁷Jedor, Aió, Zakarias ku Miklot ³⁸ku bin padi Simeia. Esis e moraba na Jerusalen, pertu di se ermons.

³⁹Ner padi Kis; Kis padi Saul; Saul padi Jonatas, Malkisua, Abinadab ku Es-Baal.

⁴⁰Jonatas padi Merib-Baal; Merib-Baal padi Mika.

⁴¹Fijus di Mika: Piton, Melek ku Tareá.

⁴²Akaz padi Jaerá; Jaerá padi Alemet, Azmavet ku Zinri. Zinri padi Moza; ⁴³Moza padi Binea ku padi Refaias. Refaias padi Eleasá ku padi Azel.

⁴⁴Azel padi seis fiju ku teneba e nomis: Azrikan, Bokru, Ismael, Searias, Obadias ku Anan.

Mortu di Saul ku si fijus

(1 Sam 31.1-13)

10 ¹Filisteus bin geria kontra Israel; israelitas kuri se dianti; manga delis kai mortu na montañas di Jilboa. ²Filisteus pega tras di Saul ku si fijus, e mata Jonatas, Abinadab ku Malkisua, fijus di Saul. ³Gera bin bida forti kontra Saul; e yangasal ku flešas, e molostal risu. ⁴Saul rabida i fala rapas ku ta lebal si tajadera: “Toma bu spada, bu matan, pa ka e jintius bin fasi trosa di mi.” Ma si rapas ka seta, pabia i tenba medu garandi. Saul toma si spada propi, i kai riba del. ⁵Oca ku rapas di tajadera oja kuma Saul muri, el tambi i toma si spada, i kai riba del, i muri. ⁶Asin ku Saul muri, ku si tris fiju; si renansa kaba.

⁷Oca ku israelitas ku moraba na kobon oja kuma se tropas kuri,

Saul ku si tris fiju muri, elis tambi e lanta, e fika se prasas, e kuri. Filisteus bin mora la.

⁸Sol mansi; filisteus sai pa bai tira kusas na kurpus di tropas ku muri, e bai oja kurpu di Saul ku si tris fiju kaidu na montaña di Jilboa. ⁹E dispil, e toma si kabesa, ku si material di gera, e manda na mon di jinti pa e leba noba pa tudu tera di filisteus, pa e konta pobu ku se idulus. ¹⁰E pui material di gera di Saul na baloba di se deus, e pindra si kabesa na baloba di se deus ku comadu Dagon.

¹¹Oca ku jinti di Jabes-Jilead obi tudu ku filisteus fasi ku Saul, ¹²tudu se omis forti e bai toma kurpus di Saul ku si fijus, e tisi elis pa Jabes, e ntera se os la bas di un karvaju, e junjuña seti dia.

¹³Asin Saul muri pabia i ka seduba fiel pa SIÑOR; i kebra lei di SIÑOR, i ka guarda si palabra. I bai buska konsiju na mon di minjer ku ta papia ku spiritus di jinti ku muri, ¹⁴i ka bai obi konsiju na boka di SIÑOR. Asin SIÑOR matal, i pasanta renu pa Davi, fiju di Jesé.

Davi unjidu rei

(2 Sam 5.1-3)

11 ¹Tudu pobu di Israel junta nunde Davi na Ebron, e falal: “Anos ku bo no sedu mesmu sangi. ²Mesmu na tempu ku Saul seduba inda rei, i abo ku ta bai-ba dianti di Israel pa gera. SIÑOR bu Deus falauba kuma bu na sedu bakiadur di si pobu Israel, bu na rena riba delis.”

10.11: 1 Sam 11.1-11 10.13: 1 Sam 13.13; 28.7

11.1: Jos 14.15

³Oca ku tudu garandis di Israel bin pa rei Davi na Ebron, i fasi kontratu ku elis la, dianti di SIÑOR. E unjil pa i sedu rei riba di Israel, suma ku SIÑOR falaba ja na boka di Samuel.

Davi ngaña Jerusalem

(2 Sam 5.6-10)

⁴Davi ku tudu Israel e bai pa Jerusalem, ku comaduba Jebus, nunde ku jebuseus moraba. ⁵Jebuseus fala Davi: “Bu ka na yentra li.” Ma nin ku ‘sin, Davi toma kuartel di Sion, ku gosi ta comadu prasa di Davi.

⁶Davi falaba si tropas: “Purmeru omi ku yentra pa ataka jebuseus, i el ku na sedu bo šef mas garandi.” Joab, fiju di Zerua, i yentra purmeru; asin i bin sedu šef di tropas.

⁷Davi bai mora na ki kuartel; asin jinti pasa ta comal prasa di Davi. ⁸I kumpu prasa na roda di kuartel, desdi Milu te na mura. Joab kumpu restu di prasa. ⁹Davi fika i na ngaña forsa kada bias mas, pabia SIÑOR ku ten tudu puder staba ku el.

Omis forti di Davi

(2 Sam 23.8-39)

¹⁰I tenba šefis di omis forti di Davi; elis ku tudu Israel e judal pa i sedu rei, suma ku SIÑOR falaba ja; e apoial pa si renu pudi fika suguru.

¹¹Purmeru di ki omis forti i sedu Jesobean, akmonita, šef di kapitons. I yalsa si kañaku kontra trizentus omi, i mata elis tudu.

¹²Dipus del, i Eleazar, fiju di Dódó, aoita, ku seduba un di ki tris

omi forti. ¹³I staba ku Davi na Pas-Damin, oca ku filisteus juntaba la pa geria na un lugar pikininu ku teneba sevada. Tropas di Israel kuri dianti di filisteus, ¹⁴ma Eleazar ku si kumpaņeris e firma na metadi di ki lugarsiņu, e difindil, e mata filisteus. SIÑOR juda elis pa e ngaña garandi vitoria.

¹⁵Un dia, tris di ki trinta šef e bai pa Davi pa pedra garandi, lungu di kaverna di Adulan. Kampamentu di filisteus staba na kobon di Refain. ¹⁶Davi staba na un kau forti; filisteus tomaba konta di Belen. ¹⁷Davi sinti disežu forti, i fala: “Paņan algin pa i tisin yagu di fonti ku sta lungu di porton di Belen pa N bibi!” ¹⁸Ki tris e pasa na metadi di kampamentu di filisteus, e bai kata yagu na ki fonti lungu di porton di Belen, e tisil pa Davi. Ma Davi nega bibil; i darmal dianti di SIÑOR, ¹⁹i fala: “Deus ta libran di fasi un kusa suma es! Nta N pudi bibi sangi di vida de omis? E pui se vida na pirigu pa tisin e yagu.” Asin i nega bibil. Es i kusa ku ki tris omi di koražen fasi.

²⁰Abisai, ermon di Joab, i seduba šef di ki trinta. I lantanda si kañaku kontra trizentus omi, i mata elis; i teneba nomi na metadi di ki trinta, ²¹tok i bin sedu se šef. Utrus ta pensa kuma i mas tenba fama di ki ki tris, ma i ka ciga di kontadu na se metadi.

²²Benaia, fiju di Jeoiada, i seduba un omi di koražen, di Kabzeel, ku

fasi manga di kusa garandi. I mata dus omi di Moab, forti suma lion. Tambi i ria, i mata lion dentru di un koba, na tempu di nevi. ²³I mata tambi un omi kumpridu di Ejitu ku teneba mas di ki dus metru di altura, ku pegaba kañaku garandi na mon, suma ransi di fisial. Benaia bai kontra el ku po pisadu, i roba kañaku na mon di ki ejipsiu, i matal ku el. ²⁴Asin ku Benaia, fiju di Jeoiada, fasi. I tenba fama suma ki tris, ²⁵ma i ka kontadu suma un delis. Ma na metadi di ki trinta, i el ku mas tenba fama. Davi pul suma êf di si guarda-kosta.

- ²⁶Omis forti di tropas e seduba:
 Asael, ermon di Joab;
 El-Anan, fiju di Dodó di Belen;
²⁷Samot di Aror;
 Elez, pelonita;
²⁸Ira, fiju di Ikes di Tekoa;
 Abiezer di Anatot;
²⁹Sibekai di Usa;
 Ilai, aoita;
³⁰Maarai di Netofá;
 Eled, fiju di Baaná, di Netofá;
³¹Itai, fiju di Ribai,
 di Jibeá di Benjamin;
 Benaia di Piraton;
³²Urai di kobon di Gaas;
 Abiel, arbatita;
³³Azmavet di Baarun;
 Eliaba di Saalbon;
³⁴Fijus di Asen di Jizon;
 Jonatas, fiju di Saji, di Arar;
³⁵Aian, fiju di Sakar, di Arar;
 Elifal, fiju di Ur;
³⁶Efer di Mekera;
 Aías, pelonita;

- ³⁷Ezru di Karmelu;
 Naarai, fiju di Ezbai;
³⁸Joel, ermon di Natan;
 Mibar, fiju di Agri;
³⁹Zelek di Amon;
 Naarai, di Beerot, ku ta leba tajadera di Joab, fiju di Zeruaia;
⁴⁰Ira ku Gareb, itritas;
⁴¹Urias, eteu;
 Zabad, fiju di Alai;
⁴²Adina, fiju di Siza,
 êf di rubenitas, ku staba riba di un grupu di trinta;
⁴³Anan, fiju di Maaka;
 Jeosafá, mitnita;
⁴⁴Uzia, asteratita;
 Sama ku Jeiel, fijus di Otan, di Aroer;
⁴⁵Jediael, fiju di Sinri, ku si ermon Joa, di Tiz;
⁴⁶Eliel di Maava;
 Jeribai ku Josavias, fijus di Elnaan;
 Itma di Moab;
⁴⁷Eliel, Obed ku Jaasiel, mezobaita.

Kilis ku bai pa Davi na Ziklag

12 ¹Oca ku Davi staba na Ziklag, nunde ki baiba dipus ku Saul, fiju di Kis, serkal, utru omis bai pa el, soldadus di koražen ku judal na gera. ²E teneba mansasas; e ta ferca pedras o manda flešas ku mon direita o mon skerda. E seduba parentis di Saul, di jorson di Benjamin. ³Ali se nomis:

- Aiezer, se êf, ku Joás,
 fijus di Semaa di Jibeá;
 Jeziel ku Pelet, fijus di Azmavet;
 Beraka ku Jeu di Anatot;

- ⁴ Ismaias di Jibeon, omi di koražen, kapiton di ki trinta; Jeremias, Jaaziel, Joanan ku Jozabad di Jedera;
- ⁵ Eluzai, Jerimot, Bealias, Semarias ku Sefatias, arufita;
- ⁶ Elkana, Isias, Azarel, Joezer ku Jasobean, di familia di Kora.
- ⁷ Joela ku Zebadias, fijus di Jeroan di Jedor.

⁸ Utru gaditas bai pa Davi na lugar forti na lala. E seduba jinti di koražen, omis forti, trenadu pa gera, yarmadu ku tajaderas ku kañakus. Se rostus parsiba ku rostu di lion; e ta kuriba suma gazela na monti. ⁹ Ezer i seduba se šef; dipus i tenba Obadias, Eliab, ¹⁰ Mismana, Jeremias, ¹¹ Atai, Eliel, ¹² Joanan, Elzabad, ¹³ Jeremias ku Makbanai, ku fasi elis onzi.

¹⁴ Ki omis di jorson di Gad e seduba kapitons di tropa; kilis ku mas garandi staba riba di mil, kilis ku mas nobu staba riba di sen. ¹⁵ I elis ku kamba riu Jordon na purmeru mis, oca ki inci tok yagu pasa pa tudu si ladus. E pantanda tudu jinti ku moraba na kobons na tudu dus ladu di riu, e pajiga elis.

¹⁶ Utru grupu di omis di Benjamin ku Judá e bin tambi pa Davi, na kau forti nunde ki staba. ¹⁷ Davi sai i da elis kontrada, i fala elis: “Si bo na bin pa mi pa judan suma amigus, ña korson sta pruntu pa junta ku bos, ma si bo bin pa ntregan na mon di ña inimigus, sin i ka ojadu un mal na mi, Deus di no papes i ta ojal, i raprindi bos.”

¹⁸ Spiritu yentra na Amasai, kil ku, mas tardi, bin sedu šef di ki trinta, i fala:

“O Davi, no sedu di bo!
O fiju di Jesé, no sta ku bo!
Pas, pas ta sta ku bo!
Pas ta sta ku kil ku na judau!
Bu Deus i bu Judadur.”

Asin Davi risibi elis, i fasi elis kapitons di tropas.

¹⁹ Utru omis di Manasés bai junta ku Davi, na ki tempu ku Davi na baiba ku filisteus pa geria kontra Saul, ma na fin i ka bin juda elis na ki gera, pabia šefis di filisteus bin papia entri elis, e dispidi Davi, e fala: “I pudi bin kustanu no kabesa si i bai pasa pa Saul, si mestre.” ²⁰ Es i omis ku bai junta ku Davi oca ki na riba pa Ziklag: Adna, Jozabad, Jediael, Mikael, Jozabad, Eliu ku Ziletai, šefis di milyaris di tropa di Manasés. ²¹ E juda Davi kontra ki tropa ku bin furtaba se kusas, pabia elis tudu e seduba omis forti di koražen, kapitons di tropas. ²² Kada dia omis ta binba pa junta ku Davi pa judal, tok i bin tene un garandi numeru di tropas.

Kilis ku bin pa Davi na Ebron

²³ Es i numeru di tropas yarmadu pa gera ku bin pa Davi na Ebron pa ntregal renu di Saul, konformi palabra di SIÑOR:

²⁴ Di jorson di Judá: 6.800 omi yarmadu pa gera, ku pega tajaderas ku kañakus;

- 25 di jorson di Simeon:
7.100 omi trenadu pa gera;
- 26 di jorson di Levi: 4.600;
- 27 kilis ku sigi Jeoiada,
3.700 omi di familia di Aron;
- 28 Zadok, un joven gereru
di koražen ku leba 22 šef
di familia di si pape;
- 29 di jorson di Benjamin,
parentis di Saul, 3.000 (maior
parti di Benjamin e fikaba
inda fiel pa familia di Saul);
- 30 di jorson di Efrain: 20.800
omi di koražen ku tenba
fama na familias di se papes;
- 31 di metadi di jorson di
Manasés: 18.000 ku se nomi
comadu pa bai fasi Davi rei;
- 32 di jorson di Isakar: 200 šef,
jiru pa sibi ke ku Israel dibi
di fasi, ku minjor tempu
pa fasil, ku tudu se ermons
ku ta obdisi se ordi;
- 33 di jorson di Zebulon: 50.000
tropa trenadu pa gera,
ku tudu koldadi material
di gera, ku jitu pa gera,
ku korson fiel;
- 34 di jorson di Naftali: 1.000
kapiton ku 37.000 omi
ku tajaderas ku kañakus;
- 35 di jorson di Dan: 28.600
purparadu pa gera;
- 36 di jorson di Aser: 40.000 omi
purparadu pa sai pa gera;
- 37 di utru banda di Jordon, di
jorson di Ruben ku di Gad ku
metadi di jorson di Manasés:
120.000 omi ku tisi tudu
koldadi material di gera.

38 Tudu ki tropas, ku staba pruntu pa gera, e bin tudu pa Ebron ku un sintidu son, pa fasi Davi rei riba di tudu Israel. Tambi tudu restu di Israel staba ku ki mesmu sintidu pa pui Davi pa i sedu rei. 39 Ki tropas e fika la ku Davi tris dia, e kume e bibi, pabia se parentis purparaba kumida pa elis. 40 Tambi se visiñus mas pertu, ku kilis di lunju suma Isakar, Zebulon ku Naftali, e tisi mulus ku kamelus ku burus ku turus, kargadu ku pon, foriña, mundus di figu ku di uva seku, biñu, azeiti, ku manga di turu ku utru limarias pa kume, pabia kontentamentu tenba na Israel.

Arka pudu na kasa di Obed-Edon

(2 Sam 6.1-11)

13 ¹Davi konsulta ideia di tudu šefis, ku kapitons di mil ku di sen. ²Dipus i papia ku tudu juntamentu di pobu, i fala: “Si bo oja kuma i bon, i kusa ku SIÑOR no Deus misti, no ta manda jinti ku rekadu pa tudu no ermons ku sta na tudu tera di Israel, tamba pa saserdotis ku levitas ku sta na se prasad ku se pontas, pa e bin junta ku nos, ³pa no bai tisi arka di no Deus, pabia no ka ligaba ku el na tempu ku Saul seduba rei.” ⁴Tudu juntamentu konkorda pa fasi asin, pabia tudu jinti oja kuma i bon.

⁵Asin Davi junta tudu Israel, desdi Sior na frontera di Ejitu te na entrada di Amat, pa e bin bai tisi arka di Deus di Kiriath-Jearin. ⁶Davi ku tudu Israel bai pa Baalá, ku sedu Kiriath-Jearin ku sta na Judá, pa

tisi di la arka di Deus, ku nomi di ki SIÑOR ku ta mora na metadi di kirubins ta comadu riba del.

⁷E tira arka di Deus na kasa di Abinadab, e pul na un kareta nobu pa lebal. Uzá ku Aió, elis ku na giaba ki kareta. ⁸Davi ku tudu Israel e na bajaba ku kontentamentu ku tudu se forsa dianti di Deus, e na kanta, e na toka arpas, violas, tambriñas, simbalus ku kornetas.

⁹Oca ke ciga na kau di masa di Kidon, turus da tapada; Uzá distindi mon i pega arka pa sugural. ¹⁰Raiba di SIÑOR lanta kontra Uzá; i matal pabia i pui mon na arka. Asin i muri la dianti di Deus.

¹¹Davi fika ku kasabi manera ku raiba di SIÑOR rebenta kontra Uzá; asin i coma ki kau Perez-Uzá; ^a ki nomi fika te aos.

¹²Ki dia Davi sinti medu di Deus, i punta: “Kuma ku N na tisi arka di Deus pa mi?” ¹³Asin i ka leba arka ku el pa prasa di Davi, ma i rabida ku el, i pul na kasa di Obed-Edon, un omi jiteu. ¹⁴Arka fika tris mis na kasa di ki familia. SIÑOR bensua familia di Obed-Edon, ku tudu ki tene.

Davi fasi kontratu ku rei Iron

(2 Sam 5.11-16)

14 ¹Iron, rei di Tiru, i manda jinti pa Davi, pa e leba madera di sedru, ku pedrerus ku karpinterus, pa e kumpu kasa pa Davi. ²Davi ntindi kuma SIÑOR firmantal ja pa i sedu rei riba di Israel, i yalsa puder di si renu pa amor di si pobu.

³La na Jerusalem Davi bin buri mas minjeris, i padi fijus macu ku femia. ⁴Esis i nomis di fijus ki padi na Jerusalem: Samua, Sobab, Natan, Salomon, ⁵Ibar, Elisua, Elpelet, ⁶Nogá, Nefeg, Jafia, ⁷Elisama, Bee-liada ku Elifelet.

Davi ngaña filisteus

(2 Sam 5.17-25)

⁸Oca ku filisteus obi noba di kuma Davi unjidu pa i sedu rei riba di tudu Israel, e lanta tudu, e bai pa paña Davi. Davi obi kila, i sai kontra elis. ⁹Filisteus bin e toma konta di kobon di Refain. ¹⁰Davi punta Deus: “N dibi di bai geria kontra filisteus? Bu na ntrega elis na ña mon?”

SIÑOR falal: “Bai, pabia N na ntregau elis.”

¹¹Davi bai pa Baal-Perazin, i ngaña elis la; i fala: “Ku ña mon Deus rebenta kontra ña inimigus suma ku yagu ta kebra orik.” Asin i coma nomi di ki kau Baal-Perazin. ^a ¹²Filisteus bandonaba se deusis la; Davi da ordi pa e kemadu na fugu.

¹³Filisteus torna bin toma konta di ki kobon. ¹⁴Davi torna punta Deus; Deus falal: “Ka bu bai direktamenti pa elis, ma boltia se tras, bu ataka elis dianti di amoreras. ¹⁵Ora ku bu obi baruju di pes ku na marša riba di amoreras, bu ta sai janan pa gera, pabia i ta kontra Deus ku sai ja bu dianti pa ngaña tropas di filisteus.” ¹⁶Davi fasi suma ku Deus mandal; e mata-mata

13.7: Kap 15.2 ^a**13.11** Perez-Uzá signifika rebentamentu kontra Uzá. **14.1:** 1 Re 5.1 **14.4:** Kap 22.9-10; 28.5-6 ^a**14.11** Baal-Perazin signifika Siñor ku ta rebenta i pasa.

tropas di filisteus desdi Jibeon te na Jezer.

¹⁷Asin fama di Davi laga na tudu ki teras; SIÑOR pui tudu ki nasons pa e medi Davi.

Purparason pa mundanta arka

15 ¹Davi kumpu kasas pa si kabesa na prasa di Davi, i purpara tambi un kau, i yarma tenda pa arka di Deus. ²I rabida i fala: “Ningin ka pudi karga arka di Deus si i ka son levitas, pabia SIÑOR kuji elis pa e ba ta karga arka, tambi pa sirbi Deus pa sempri.”

³Davi junta tudu Israel na Jerusalen pa e bai tisi arka di SIÑOR pa pul na ki kau ki purparaba ja pa el. ⁴I junta tambi fijus di Aron ku levitas.

⁵ Di fijus di Koat i bin Uriel ku seduba šef, ku 120 di si ermons.

⁶ Di fijus di Merari i bin Asaias, se šef, ku 220 di si ermons.

⁷ Di fijus di Jerson i bin Joel, se šef, ku 130 di si ermons.

⁸ Di fijus di Elizafan i bin Semaias, se šef, ku 200 di si ermons.

⁹ Di fijus di Ebron i bin Eliel, se šef, ku 80 di si ermons.

¹⁰ Di fijus di Uziel i bin Aminadab, se šef, ku 112 di si ermons.

¹¹Davi coma saserdotis Zadok ku Abiatar, ku levitas Uriel, Asaias,

Joel, Semaias, Eliel ku Aminadab, ¹²i fala elis: “Abos i šefis di familias di levitas. Bo purifika bo kabesa, ku bo ermons, pa bo pudi tisi arka di SIÑOR, Deus di Israel, pa kau ku N purpara ja pa el. ¹³Ki purmeru bias i ka abos ku bai kargal pa tisi. Pabia di kila SIÑOR rebenta ku nos, suma ku no ka puntal manera diritu di tisi.”

¹⁴Asin saserdotis ku levitas e purifika, pa e pudi bai tisi arka di SIÑOR Deus di Israel. ¹⁵Levitas bai, e miti varas na anilias di arka di Deus, e kargal na se ombras, konformi ordis ku SIÑOR daba na boka di Moisés.

¹⁶Davi fala šefis di levitas pa e kuji se ermons ku sibi kanta, pa e tisi tambi instrumentus di musika suma violas, arpas ku simbalus, pa e toka, e kanta altu ku kontentamentu.

¹⁷Asin levitas kuji Eman, fijus di Joel. E kuji tambi Asaf, fijus di Berekias, na metadi di se ermons. Di se ermons di familia di Merari e kuji Etan, fijus di Kusaias. ¹⁸E kuji tambi utru ermons pa juda elis: Zakarias, Beni, Jaaziel, Semiramot, Jeiel, Uni, Eliab, Benaia, Maaseias, Matitias, Elifeleu ku Mikneias, ku Obed-Edon ku Jeiel ku sedu porterus.

¹⁹Ki kantaduris Eman, Asaf ku Etan, elis ku tenba ku toka simbalus di metal. ²⁰Zakarias, Aziel, Semiramot, Jeiel, Uni, Eliab, Maaseias ku Benaia e tenba ku toka violas di nota altu. ²¹Matitias, Elifeleu, Mikneias, Obed-Edon, Jeiel ku Azazias e tenba ku toka arpas di nota bas pa kumpaňa melodia. ²²Kenanias, šef di levitas, el ku sedu nkargadu

15.1: Sai 25.10 15.2: Num 7.9 15.4: Kap 6.49-50

15.11: 2 Sam 15.24 15.11: 1 Sam 22.20

15.13: Kap 13.7-11 15.15: Sai 25.12-15; 1 Re 8.8

15.15: Num 4.15; 7.9 15.16: 2 Kron 5.13; Esd 3.10-11; Ne 12.31.40-43; Sal 81.1; 92.1-3; 95.1

15.17: Kap 6.33,39,44

di kantigas, pa nsaia jinti, tambi pa diriži elis, pabia i tenba jitu na kila.

²³Berekias ku Elkana e kujidu pa sedu guardas di arka. ²⁴Obed-Edon ku Jeias tambi e seduba guardas di arka. Saserdotis Sebanias, Jeosafá, Netanel, Amasai, Zakarias, Benaia ku Eliezer e kujidu pa toka korneta dianti di arka di Deus.

Arka lebadu pa Jerusalen

(2 Sam 6.12-22)

²⁵Asin Davi, ku garandis di Israel, ku kapitons di mil, e bai ku tudu kontentamentu pa toma arka di kontratu di SIÑOR na kasa di Obed-Edon. ²⁶Manera ku Deus juda ki levitas ku na lebaba arka di kontratu di SIÑOR, e mata seti turu nobu ku seti karnel macu suma sakrifisiu. ²⁷Davi bistiba un kamisoti kumpridu di liñu finu, suma tambi tudu ki levitas ku na kargaba arka, ku kantaduris, ku Kenanias, se diriženti di kantiga. Davi bistiba tambi un efodi di liñu. ²⁸Tudu pobu di Israel kumpaña arka di kontratu di SIÑOR, ku gritus di kontentamentu, ku toku di cifris di karnel, kornetas, simbalus, violas ku arpas. ²⁹Oca ku arka di kontratu di SIÑOR na yentraba na prasa di Davi, Mikal, fiju femia di Saul, i jubi na janela, i oja Davi na baja, i na toka; i disprezal na si korson.

16 ¹E leba arka di Deus, e pul dentru di tenda ku Davi yarmaba pa el; e pursenta ofertas kemadu ku ofertas di pas dianti di Deus. ²Oca ku Davi kaba pursenta ki ofertas kemadu ku di pas, i

bensua pobu na nomi di SIÑOR. ³I pati kada omi ku kada minjer na Israel un pon, un bon padas di karni ku un bulu di uvas seku.

⁴Davi kuji utru levitas pa e fasi sirvis dianti di arka di SIÑOR, pa kanta, pa gardisi, pa ngaba SIÑOR Deus di Israel. ⁵Asaf seduba šef, ku Zakarias si sugundu. Jeiel, Semiramot, Jeiel, Matitias, Eliab, Benaia, Obed-Edon ku Jeiel e kujidu pa toka violas ku arpas; Asaf tenba ku toka simbalus. ⁶Saserdotis Benaia ku Jaaziel e tenba ku toka kornetas sempri dianti di arka di kontratu di Deus.

Kantiga di gardisimentu

(Sal 105.1-15; 96.1-13;)

⁷Na ki mesmu dia, pa purmeru bias, Davi ntrega Asaf ku si ermons kargu di kanta e kantiga pa ngaba SIÑOR.

⁸Bo ngaba SIÑOR,
bo coma si nomi;
bo konta na metadi
di nasons kusas ki fasi.

⁹Bo kanta pa el, bo ngabal
ku kantiga,
bo papia di tudu kusas
garandi ki fasi.

¹⁰Bo njata na si nomi sagradu.
Kilis ku ta buska SIÑOR,
pa e kontenti na se korson.

¹¹Bo buska SIÑOR,
bo buska si forsa;
bo buska si pursensa sempri.

15.24: Kap 16.6; Num 10.8 15.27: 1 Sam 2.18

15.29: 1 Sam 18.20-21 16.2: Sir 1.3; 3.1

16.3: 2 Kron 35.7-8; Ne 8.10 16.11: Is 55.6; Am 5.6; Sof 2.3

- 12-13 Abos, si servus,
jorson di Israel,
abos, fijus di Jakó, kilis ki kuji,
bo lembra di kusas
garandi ki fasi,
si milagris, ku si palabras
di julgamentu.
- 14 El i SIÑOR no Deus;
si julgamentus sta na tudu
parti di mundu.
- 15 Bo ba ta lembra sempri
di si kontratu,
ki palabra ki firmanta
pa tudu tempu,
- 16 ki kontratu ki fasi ku Abraon,
ki juramentu ki fasi pa Isak.
- 17 I konfirmal pa Jakó suma lei,
i dal pa Israel suma kontratu
ku ka ta kaba;
- 18 i fala: “N na dau tera
di Kanaan
suma kiñon di bo yardansa.”
- 19 Bo seduba inda puku
na numeru,
puku omis, ospris na tera.
- 20 Bo papes yanda-yanda
di un nason pa utru,
di un renu pa utru pobu.
- 21 Deus ka disa ningin kalka elis;
pa amor delis i raprindi reis,
i fala:
- 22 “Ka bo toka na jinti ku N kuji,
nin ka bo fasi
ña anunsiaduris mal.”
- 23 Abos di tudu mundu,
bo kanta pa SIÑOR,
- bo konta di si salbason
kada dia.
- 24 Bo diklara si gloria
na metadi di nasons,
bo konta tudu rasas kusas
garandi ki fasi.
- 25 SIÑOR i garandi,
i mersi ngabadu;
i mas mersi rispitu
di ki tudu deusis,
- 26 pabia tudu deusis di utru
nasons e sedu idulus son,
ma SIÑOR, el ku kumpu seu.
- 27 El i un Rei gloriosu,
rodiadu di garandesas;
forsa ku kontentamentu
e ta inci si kau di mora.
- 28 Abos, familias di nasons,
bo glorifika SIÑOR,
bo ngaba si gloria ku si forsa,
- 29 bo ngaba gloria
di Nomi di SIÑOR.
Bo tisi ofertis, bo bin si dianti;
bo adora SIÑOR na bonitasku
di si puresa.
- 30 Tudu mundu
pa i tirmi si dianti!
Mundu sta firmi;
i ka pudi bulbulidu.
- 31 Abos seu ku tera, bo kontenti!
Pa i diklaradu na metadi
di nasons kuma
SIÑOR na rena.
- 32 Mar pa i somna,
ku tudu ku sta nel;
Kampada pa i kontenti,
ku tudu ku sta nel!
- 33 Arvuris di matu na kanta
ku kontentamentu
dianti di SIÑOR,
pabia i na bin pa julga mundu.

16.16: Kum 15.18; 17.2; 26.3; 28.13-14 16.18: Kum 12.7
16.21: Kum 31.24,29,42; Šef 9.13-18 16.26: Kum 1.1
16.27: Sal 8.1; 16.11; 96.6; Jon 17.24 16.28: Kap 29.10-13
16.29: Sal 29.2 16.34: 2 Kron 5.13; 7.3; 20.21; Esd 3.11;
Sal 136; Jer 33.11

³⁴ Bo ngaba SIÑOR
pabia el i bon;
si bondadi i pa sempri.

³⁵ Bo fala: “O Deus
no Salbadur, salbanu,
bu juntanu, bu libranu
di nasons,
pa no pudi gardisiu,
no ngaba bu nomi sagradu
ku kontentamentu.”

³⁶ SIÑOR Deus di Israel,
pa i ngabadu pa sempri!

Tudu jinti fala “Amen,” e ngaba SIÑOR.

Organisason di kultus

³⁷ Davi fika Asaf ku si ermons
dianti di arka di kontratu di SIÑOR,
pa e fasi sirvis la sempri, konfor-
mi kil ku lei manda pa kada dia.
³⁸ Tambi i fika Obed-Edon, fiju di Je-
dutun, ku elis tambi, ku si sesenta
i oitu ermon. Obed-Edon ku Osa e
seduba porterus.

³⁹ Davi fika tambi saserdoti Za-
dok, ku utru saserdotis si ermons,
dianti di tenda di SIÑOR ku staba
na kau altu na Jibeon, ⁴⁰ pa pursen-
ta ofertas kemadu pa SIÑOR riba
di altar di ofertas kemadu, sem-
pri parmaña ku di tardi, konformi
tudu ku sta skritu na lei ku SIÑOR
da Israel. ⁴¹ Eman ku Jedutun e sta-
ba ku elis, ku utru jinti ku kujidu,
se nomis comadu, e nkargadu pa
ngaba SIÑOR, pabia si bondadi i
pa sempri. ⁴² Eman ku Jedutun, elis
ku ta tokaba kornetas ku simbalus,
ku utru instrumentus di musika di
Davi, ma fijus di Jedutun e ta guar-
daba porton.

⁴³ Tudu jinti bai, kada kin pa si
kasa. Davi riba pa si kasa pa ben-
sua si familia.

Davi misti kumpu templu

(2 Sam 7.1-17)

17 ¹ Oca ku Davi mora ja na si
kasa, i fala anunsiadur Na-
tan: “Ali N mora na kasa di madera
di sedru, ma arka di kontratu di
SIÑOR sta na tenda.”

² Natan fala Davi: “Bu pudi fasi
tudu ku bu na sinti dentru di bu
korson, pabia Deus sta ku bo.”

³ Ma, ki di noti, SIÑOR bin papia
ku Natan, i falal: ⁴ “Bai konta ña ser-
vu Davi kuma SIÑOR fala: ‘I ka abo
ku na kumpu kasa pa N mora nel.
⁵ N ka ciga di mora na nin un kasa,
disna di dia ku N tisi Israel di Ejitu te
aos. N mora son na tenda ku ta mun-
dantadu di un kau pa utru. ⁶ Nta na
tudu kau ku N yanda ku tudu Israel,
N ciga di punta kualker di sêfis ku N
pui pa e gia ña pobu nos ke ku man-
da e ka kumpun un kasa di sedru?’

⁷ “Asin bu pudi bai fala ña servu
Davi kuma SIÑOR ku ten tudu puder
fala: ‘N tirau tras di karnel, na kau
nunde ku bu ta bakiaba nel, pa bu
sedu sêf di ña pobu Israel. ⁸ N staba
ku bo na tudu kau ku bu bai, N bai
bu dianti, N kaba ku tudu bu inimi-
gus. Tambi N dau fama suma di omis
mas garandi di mundu. ⁹ N na ranja
un kau nunde ku N na paranta ña
pobu Israel, pa e tene se propi tera

16.36: Lei 27.15-26; Ne 8.6; 1 Kor 14.16 **16.37:** Kap 15.17-24;
25.1-6; 2 Kron 8.14 **16.38:** 2 Sam 6.10

16.39: 1 Re 3.4 **16.40:** Sai 29.38-42 **16.41:** Kap 25.1
17.4: Kap 22.7-8; 28.2-3 **17.5:** 1 Re 8.27

17.7: 1 Sam 16.11-13; Am 7.14-15

nunde ke na sinta, pa nunca mas e ka rinkadu pa lebadu pa utru kau, nin jinti mau ka na kansa elis mas, suma ke ta fasiba, ¹⁰disna di tempu ku N pui sêfis riba di ña pobu Israel. N na bota tudu bu inimigus bas.

“Tambi N na kontau kuma ami, SIÑOR, N na firmanta bu renansa. ¹¹Ora ku bu dias kaba, pa bu pudi bai pa bu papes, ami N na lantanda algin di bu jorson pa i toma bu lugar, un di bu propi fijus; N na firmanta si renu. ¹²El ku na kumpun kasa; ami N na firmanta si tronu pa sempri. ¹³N na sedu si pape; el i na sedu ña fiju. N ka na tira ña bondadi nel, suma ku N fasi ku kil ku staba antis di bo. ¹⁴N na pul riba di ña kasa ku ña renu pa sempri; si tronu na fika firmi pa sempri.’”

¹⁵Natan konta Davi tudu ki palabras, ku tudu kusa ku Deus mostral.

Orason di Davi

(2 Sam 7.18-29)

¹⁶Rei Davi yentra i sinta dianti di SIÑOR, i fala: “O SIÑOR Deus, nta ami i kin? O kal balur ku ña familia ten, pa bu tisin te ne puntu? ¹⁷Bu na oja es suma un kusa pikininu, o Deus; asin bu fala gosi aserka di familia di bu servu na tempus ku na bin. Abo, SIÑOR Deus, bu na tratan suma un omi importanti. ¹⁸Ke mas ku N pudi fala aserka di onra ku bu fasin, ami Davi, bu servu? Bu kungsi bu servu diritu. ¹⁹O SIÑOR, pa amor di bu servu, konformi bu

vontadi, bu fasin pa N sibi tudu e kusas garandi ku bu na fasi.

²⁰“SIÑOR, i ka ten ningin suma bo, nin i ka ten utru deus fora di bo, konformi tudu ku no obi ku no oreja. ²¹Nta i ten algin suma bu pobu Israel? Elis i uniku jinti na mundu ku bu liberta di katiberasku pa e sedu bu pobu. Bu nomi torna kunsidu pabia di kusas garandi i meduñu ku bu fasi. Bu bai dianti di bu pobu ku bu tira di Ejitu, bu serka utru nasons pa bu pobu pudi yentra. ²²Bu toma bu pobu Israel pa e sedu di bo pa sempri; abo, SIÑOR, bu sedu se Deus.

²³“O SIÑOR, ki palabra ku bu fala aserka di bu servu ku si familia, bu ta konfirmal pa sempri, bu fasi ke ku bu fala. ²⁴Asin bu nomi na sta firmi, i na ngabadu pa sempri. Jinti na fala: ‘SIÑOR ku ten tudu puder, Deus di Israel, el ku sta riba di Israel.’ Renu di bu servu Davi i na sta firmi bu dianti. ²⁵Abo, ña Deus, bu mostra bu servu kuma bu na firmanta si renu. Pabia di kila, bu servu oja fianza pa ora bu dianti. ²⁶O SIÑOR, abo i Deus. Bu fala e bon kusa aserka di bu servu. ²⁷Di bon vontadi bu bensua jorson di bu servu, pa i sta sempri bu dianti. Abo, SIÑOR, bu bensual ja; asin i na bensuadu pa sempri.”

Vitorias di Davi

(2 Sam 8.1-18)

18 ¹Dipus di kila, Davi torna ngaña filisteus, i domina elis, i roba elis prasa di Gat ku si tabankas na roda. ²I ngaña tambimoabitas; kilas fika bas del, pa ba ta paga mpustu.

^{17.10:} Sêf 2.16 ^{17.11:} Kap 28.5; 29.28 ^{17.12:} 1 Re 5.5; 2 Kron 3—4 ^{17.13:} Kap 10.13-14 ^{17.20:} Sai 15.11
^{17.21:} Lei 4.7,32-34 ^{17.22:} Sai 19.5-6

³Oca ku Adad-Ezer, rei di Zobá, bai pa toma konta di tera lungu di riu Eufrates, Davi bai ngañal lungu di Amat, ⁴i tomal mil karu, seti mil tropa di kabalu ku vinti mil tropa di pe. I guarda sen kabalu di karu; restu i korta se nervus di pe.

⁵Sirus di Damasku bin pa sakura Adad-Ezer, rei di Zobá, ma Davi mata vinti i dus mil delis, ⁶i pui kampamentus di tropas na se tera; sirus fika bas di Davi, e ta paga mpustu. SIÑOR ta daba Davi vitoria na kualker kau ki bai. ⁷Davi toma tajaderas di uru ku sêfis di Adad-Ezer ta usaba, i leba elis pa Jerusalem. ⁸I toma tambi manga di kobri di Tibat ku di Kun, prasas di Adad-Ezer. Mas tardi Salomon bin usa ki kobri pa kumpu ki bañera di templu, ku kulunas ku material di kobri.

⁹Oca ku Tou, ^a rei di Amat, obi kuma Davi kaba ku tudu tropas di Adad-Ezer, rei di Zobá, ¹⁰i manda si fiju Adoran pa Davi pa falal manteña, pa dal parabens manera ki geria ku Adad-Ezer, i ngañal, pabia Adad-Ezer i ta fasiba gera kontra Tou. Tou mandal tambi manga di kusa di uru, prata ku kobri. ¹¹Davi toma ki kusas, i dedika elis pa SIÑOR, tudu ku utru prata ku uru ki tomaba di tudu e nasons: edomeus, moabitas, amonitas, filisteus ku amalekitas.

¹²Fora di kila, Abisai, fiju di Zeruaia, i mata disoitu mil edomeu na Kobon di Sal, ¹³i pui kampamentus di tropas na Edon. Tudu jinti di Edon e fika bas di Davi. SIÑOR ta

daba Davi vitoria na kualker kau ki bai.

¹⁴Davi rena riba di tudu Israel, i ta julgaba tudu si pobu ku bon justisa. ¹⁵Joab, fiju di Zeruaia, i seduba sêf di tropas; Jeosafá, fiju di Ailud, el ku ta skirbiba tudu ku na pasa na renu. ¹⁶Zadok, fiju di Aitub, ku Abimelek, fiju di Abiatar, e seduba saserdotis; Savsa seduba sekretariu. ¹⁷Benaia, fiju di Jeoiada, i staba riba di kereteus ku peleteus. Fijus di Davi staba na pusison mas altu, lungu di rei.

Davi ngaña gera kontra amonitas ku sirus

(2 Sam 10.1-19)

19 ¹Mas tardi Naás, rei di amonitas, i muri. Si fiju bin rena na si lugar. ²Davi fala: “N na mostra amisadi pa Anun, fiju di Naás, pabia si pape ta mostraba amisadi pa mi.” Asin i manda jinti pa e bai falal manteña pabia di mortu di si pape.

Oca ku omis ku Davi manda bin ciga na tera di fijus di Amon, pa fala Anun manteña, ³sêfis di amonitas punta Anun: “Bu kuda kuma Davi misti mostra rispitu pa bu pape manera ki manda jinti pa e bin falau manteña? Nta e ka bin nan pa bo pa jubi kuma ku tera sta, pa e pudi bin tomal?”

⁴Asin Anun paña ki omis di Davi, i rapa elis, i korta se ropa te na

18.3: 1 Sam 14.47 18.8: 2 Kron 4.2-5,12

^a 18.9 Tou o Toi 18.11: Kap 22.14; 29.2-3

18.12: 1 Sam 26.6 18.15: 2 Sam 20.24

18.16: 2 Sam 15.24 18.15: 1 Sam 23.20-23

19.1: 1 Sam 12.12

rabada, i manda elis pa e bai. ⁵Oca ku Davi kontadu aserka di ke ku ki omis pasa, i manda jinti pa e bai da elis kontrada, pabia e staba ku garandi borgoña. Rei manda fala elis: “Bo fika na Jerikó tok bo barba kirs; dipus bo ta bin.”

⁶Oca ku amonitas oja kuma kusa ke fasi i pui Davi sinti odiu kontra elis, Anun ku amonitas e manda trinta i kuaru tonolada di prata pa luga karus ku omis di kabalú di Mesopotamia, Siria di Maaka, ku Zobá. ⁷E luga trinta i dus mil karu ku bin, juntu ku rei di Maaka ku si tropas, e kampa lungu di Medeba. Amonitas tambí e sai na se prasas, e junta, e bai pa gera.

⁸Oca ku Davi obi kila, i manda Joab ku tudu si tropas. ⁹Amonitas sai, e toma pusison di gera danti di porton di prasa. Ki utru reis ku bin e formaba aparti, fora di prasa.

¹⁰Joab oja kuma ku tropas formaba kontra el danti ku tras. I kuji utrus di minjor tropas di Israel, i forma elis kontra sirus. ¹¹I ntrega restu di tropas na mon di si ermon Abisai; e bai forma kontra amonitas. ¹²Joab fala Abisai: “Si sirus bin mas mi forsa, bu ta bin sakuran; si amonitas bin mas bo forsa, N ta bai sakurau. ¹³Sedu forti! No geria ku koražen pa no pobu ku prasas di no Deus. SIÑOR ta fasi kil ki bon na si uju.”

¹⁴Joab ku tropas ku staba ku el e avansa pa geria ku sirus. Kilas kuri si danti. ¹⁵Amonitas oja kuma sirus na kuri; elis tambí e kuri danti

di Abisai, ermon di Joab, e bai yentra na prasa. Joab riba pa Jerusalen.

¹⁶Sirus oja kuma e pirdi gera danti di Israel, e manda buska utru sirus ku moraba na utru banda di riu Eufrates. Sofak, kapiton di tropas di Adad-Ezer, i staba se danti.

¹⁷Oca ku jinti konta Davi, i junta tudu tropas di Israel, i kamba riu Jordon, i bai toma pusison di gera kontra elis. Sirus tambí e bin geria kontra el, ¹⁸ma e kuri danti di Israel. Davi mata seti mil di se omis di karu, ku korenta mil omi di pe. I mata tambí Sofak, kapiton di se tropas. ¹⁹Oca ku reis ku staba bas di Adad-Ezer oja kuma e pirdi gera danti di Israel, e fasi pas ku Davi, e fika bas del. Nunka mas sirus ka torna sinti vontadi di bai sakura amonitas.

Davi ngaña Rabá

(2 Sam 12.26-31)

20 ¹Dipus di un anu, na tempu ku reis kustuma ta bai gera, Joab sai ku tropas, i dana tera di amonitas; i bai pa Rabá, i tajal. Ma Davi fika na Jerusalen. Joab ataka Rabá, i danal. ²Davi tira koroa na kabesa di rei; ki koroa di uru, ku pesaba serka di trinta i kuaru kilu, i teneba pedras di balur nel. I pudu riba di kabesa di Davi, ku toma manga di kusa di ki prasa, i leba elis. ³I leba tambí jinti ku staba la, i pui elis tarbaja ku seras, ku mancadus ku pikaretas di feru. Asin ki fasi ku tudu prasas di amonitas. Dipus Davi ku tudu tropas e riba pa Jerusalen.

Geras kontra filisteus

(2 Sam 21.15-22)

⁴Mas tardi, gera bin lanta kontra filisteus na Jezer. Na ki tempu Sibekai di Usa i mata Sipai, di jorson di jiganti. Filisteus bin baša kabesa.

⁵I torna ten mas gera kontra filisteus. El-Anan, fiju di Jair, i mata Lami, ermon di ki jiteu Golias, ku po di si kañaku seduba suma ransi di fisial.

⁶I fasidu mas utru gera na Gat, nunde ki tenba un omi kumpri-du dimas ku teneba vinti i kuaru dedu, seis na kada mon ku seis na kada pe. El tamba i seduba di jorson di jiganti. ⁷I fika i na koba Israel, i na disafia elis, ma Jonatas, fiju di Simeia, ermon di Davi, i matal.

⁸Ki omis ku Davi ku si omis mata e padidu na jorson di jigantis di Gat.

Davi fasi konta di tropas

(2 Sam 24.1-25)

21 ¹Satanas lanta kontra Israel, i cuci Davi pa i fasi resensiamentu. ²Davi fala Joab ku utru šefis: “Bo bai fasi konta di israelitas desdi Berseba te na Dan, bo tisin konta, pa N sibi se numeru.”

³Joab falal: “Ñu Rei, SIÑOR ta buri si pobu sen bias mas! Nta elis tudu e ka sedu servus di Ñu Rei? Ke ku manda Ñu misti fasi e kusa ku pudi tisi kulpa riba di Israel?”

⁴Ma palabra di rei tenba forsa kontra Joab. Asin Joab sai, i pasa na tudu tera di Israel; dipus i riba pa Jerusalen, ⁵i konta Davi numeru di omis ku pudi bai gera. Na tudu Israel i tenba 1.100.000 omi ku ta usa spada, ku 470.000 di Judá. ⁶Joab

ka fasi konta di omis di Levi nin di Benjamin, pabia ki ordi di rei i nu-jenti pa el.

⁷Deus ka fika kontenti ku ki kusa ku fasidu; asin i kastiga Israel. ⁸Davi fala Deus: “N peka ciu ne kusa ku N fasi. N pidu pa bu tira kulpa di bu servu, pabia N fasi suma tulu.”

⁹SIÑOR papia ku Gad, anunsia-dur di Deus na sirvis di Davi, i falal: ¹⁰“Bai konta Davi kuma SIÑOR fala: ‘N na pui tris kusa bu dianti; kuji un son delis pa N fasiu el.’”

¹¹Gad bai pa Davi i falal: “Asin ku SIÑOR fala: ‘Kuji kil ku bu misti: ¹²tris anu di fomi, tris mis di kuri dianti di bu inimigus ku na serkau ku spada, o tris dia di spada di SIÑOR ku sedu duensa meduñu na tera, ora ku anju di SIÑOR na leba mortu pa tudu parti di Israel.’ Jubi kal rasposta ku N na leba pa kil ku mandan.”

¹³Davi fala Gad: “N foronta dimas! Ma i minjor pa N kai na mon di SIÑOR, pabia i ta ten garandi pena di jinti; libran di N kai na mon di omis!”

¹⁴Asin SIÑOR manda duensa meduñu riba di Israel, tok setenta mil jinti muri. ¹⁵SIÑOR manda un anju pa dana Jerusalen. Oca ku anju kumsa na danal, SIÑOR ojal, i muda ideia ki teneba di fasi mal, i fala ki anju danadur: “I justa! Bu pudi para ja.” Anju di SIÑOR staba lungu di kau di masa trigu di un jebuseu comadu Ornan.

20.5: 1 Sam 17.4 **21.1:** Jo 1.6-12; 2.1-6; Zak 3.1;

Mat 4.3-11; Jon 13.2; At 5.3; Apok 12.10

21.6: Kap 27.23-24 **21.8:** 2 Sam 12.13 **21.8:** 1 Sam 13.13;

26.21; 2 Sam 13.12-13; 2 Kron 16.9; Jer 5.21 **21.9:** Kap 29.29

21.15: Sai 32.14 **21.15:** 2 Kron 3.1

¹⁶Davi yalsa si uju, i oja anju di SIÑOR ku staba na ar, ku distindi mon ku spada riba di Jerusalem. Davi ku garandis, elis tudu e bisti saku, e mborka na con. ¹⁷Davi fala Deus: “Nta i ka ami ku manda pa omis resensiadu? I ami propi ku peka, N fasi mal, ma e karnelis, ke ke fasi? SIÑOR ña Deus, N misti pa bu kastigan, ami ku ña familia, ma tira e kastigu riba di bu pobu.”

¹⁸Anju di SIÑOR fala Gad pa i konta Davi pa i bai kumpu altar pa SIÑOR na kau di masa di ki jebuseu Ornan. ¹⁹Davi obdisi palabra ku Gad fala na nomi di SIÑOR, i bai.

²⁰Oca ku Ornan ku si kuation fiju na masa trigu, i vira i oja anju; si fiju bai sukundi. ²¹Oca ku Davi ciga, Ornan ojal, i sai na kau di masa, i bai dal kontrada, i mpina ku rostu na con si danti. ²²Davi falal: “Bindin ki bu kau di masa trigu pa N kumpu un altar pa SIÑOR, pa i pudi kaba ku e praga riba di pobu. N na pagau si pres sertu.”

²³Ornan fala Davi: “Ñu Rei, tomal, bu fasi ke ku bu misti fasi. Ali N na da ña turus pa oferta kemadu, ku ña makina di masa pa bu fasil leña, tambi ku trigu pa oferta di kumida. N na dau tudu.”

²⁴Davi ruspundi Ornan i falal: “Nau, i ka pudi sedu asin. N misti kumpral na si balur. Bindin el na pres sertu, pabia N ka na toma nada di bo pa SIÑOR, nin N ka na da oferta kemadu ku ka kultan nada.”

²⁵Asin Davi paga Ornan seizen-tus mueda di uru pa ki kau, ²⁶i kumpu la un altar pa SIÑOR, i pur-senta ofertas kemadu ku ofertas di pas. I coma SIÑOR; i ruspundil ku fugu di seu riba di altar di oferta kemadu.

²⁷SIÑOR da ordi pa anju; kila tor-na si spada na baiña. ²⁸Na ki ora Davi oja kuma SIÑOR ruspundil; i pursenta sakrifisius la na ki kau di masa di Ornan. ²⁹Tenda di SIÑOR ku Moisés kumpu na lala, ku altar di oferta kemadu, staba na kau altu di Jibeon, ³⁰ma Davi ka pudiba bai la pa buska SIÑOR, pabia i tenba medu di spada di anju di SIÑOR.

22 ¹Davi fala: “Es i kau ku kasa di SIÑOR Deus na kumpudu nel; tambi es na sedu altar di oferta kemadu pa Israel.”

Davi fasi purparason pa kumpu templu

²Davi da ordi pa junta tudu stran-gerus ku staba na tera di Israel. I pui utrus ku sibi korta pedra pa e kumpu blokus di pedra pa kumpu kasa di Deus. ³I junta manga di feru pa fasi junturas ku pregus pa portons di entrada, ku kobri ku ka pudiba ja pesadu pabia i ciu dimas, ⁴ku manga di madera di sedru, sin kon-ta, pabia jinti di Sidon ku Tiru e ta tisiba manga del pa Davi.

⁵Davi ta falaba: “Kasa ku ten ku kumpudu pa SIÑOR i dibi di sedu garandi, spesial, pa i ten fama tok jinti di tudu nasons na ngaba si bonitasku. Ña fiju Salomon i mui-tu nobu, i ka ten inda spiriensia; i

21.16: Num 14.5 **21.26:** Sir 9.24 **21.29:** Kap 16.39;
Sai 40; 1 Re 3.4 **22.1:** 2 Kron 3.1 **22.2:** 1 Re 9.20-21;
2 Kron 2.17-18 **22.3:** Kap 29.2,7; 1 Re 7.47

ami propi ku na purpara material.” Asin Davi purpara manga di kusa antis di muri.

⁶Un dia i coma si fiju Salomon, i dal ordi pa i kumpu kasa pa SIÑOR Deus di Israel. ⁷I falal: “Ña fiju, N teneba na sintidu pa kumpu un kasa pa nomi di SIÑOR ña Deus, ⁸ma palabra di SIÑOR bin pa mi, i falan: ‘Bu darma sangi ciu, bu fasi manga di geras. Bu ka na kumpu kasa pa mi pabia di ki manga di sangi ku bu darma na con ña dian-ti. ⁹Bu na padi un fiju ku na sedu omi di diskansu, pabia ami N na dal diskansu di tudu si inimigus na si roda. Si nomi na sedu Salomon; ^aN na da pas ku diskansu pa Israel na dias di si renansa. ¹⁰I el ku na kumpu kasa pa ña nomi. I na sedu ña fiju, N na sedu si pape; N na konfirma tronu di si renansa riba di Israel pa sempri.’

¹¹“Asin, ña fiju, pa SIÑOR sta ku bo; N dija pa kusas kuri diritu na bu vida, pa bu kumpu kasa di SIÑOR bu Deus, suma ki fala aserka di bo. ¹²SIÑOR tambi pa i dau jiresa ku ntindimentu, pa bu pudi guberna Israel diritu, pa bu obdisi lei di SIÑOR bu Deus. ¹³Si bu toma sintidu pa kumpri leis ku regras ku SIÑOR da Moisés pa Israel, kusas na kuriu diritu. Sedu forti, bu ten koražen; ka bu medi nin ka bu panta. ¹⁴N fasi forsa, N junta 3.450 tonolada di uru pa kasa di SIÑOR, ku 34.500 tonolada di prata, tambi ku kobri ku feru ku ka pudi pesadu pabia i ciu dimas. N purpara tambi madera ku pedras, ma bu pudi bin buri kil ku na falta.

¹⁵Bu tene manga di mestre di obra: kortaduris di pedra, pedrerus ku karpinterus, ku jinti sin numeru ku ten jitu di fasi tudu koldadi tarbaju spesial ¹⁶na uru, prata, kobri ku feru. Lanta, bu pui mon na tarbaju! SIÑOR i ta sta ku bo.”

¹⁷Davi da ordi pa tudu sêfis di Israel pa e juda si fiju Salomon; i fala elis: ¹⁸“SIÑOR bo Deus sta ku bos, i da bos diskansu na tudu ladu, pabia i ntrega moraduris di tera na ña mon; tera sta bas di SIÑOR ku si pobu. ¹⁹Gosi, bo pui bo sintidu ku tudu bo korson pa buska SIÑOR bo Deus; bo lanta, bo kumpu kau sagradu di SIÑOR Deus, pa arka di si kontratu, ku kusas sagradu di Deus, pudi tisidu pa kasa ku na bin kumpudu pa si nomi.”

23 ¹Oca ku Davi beju ba ja, i fasi si si fiju Salomon pa i rena riba di Israel.

Tarbaju di levitas

²Davi junta tudu sêfis di Israel, suma tambi saserdotis ku levitas. ³Levitas di trinta anu di idadi pa riba e kontadu; numeru ku reżistadu i sedu trinta i oitu mil omi. ⁴Davi rapati elis tarbaju, i fala kuma vinti i kuartu mil na sta riba di tarbaju di kasa di SIÑOR; seis mil na sedu sêfis ku juisis; ⁵kuartu mil na sedu porterus; utru kuartu mil na ba ta ngaba

22.8: Kap 28.3; 1 Re 5.3 ^a **22.9** Salomon signifika pas. **22.11:** 3 Jon 2 **22.12:** 2 Kron 1.8-12 **22.13:** Lei 4.40 **22.13:** Jos 1.6-9 **22.19:** Lei 4.29 **23.1:** 1 Re 1.33-40 **23.3:** Num 3.39 **23.4:** Kap 26.29-31; Lei 16.18; 17.8-10; 2 Kro 19.8 **23.5:** Kap 9.17-27; 15.23-24; 16.38; 26.1-12; 2 Kron 8.14; 35.15 **23.5:** Kap 6.31-47; 9.33; 1 Re 10.12; 2 Kron 29.26; Am 6.5

SIÑOR ku instrumentus, ku el, Davi, i kumpu pa ngabal. ⁶Davi rapati elis na grupus konformi familias di Levi: Jerson, Koat ku Merari.

⁷Jerson teneba dus fiju: Ladan ku Simeï. ⁸Ladan teneba tris fiju: Jeiel ku sedu êf, Zetan ku Joel. ⁹Simeï teneba tris fiju: Selomit, Aziel ku Aran. Esis i êfis di familia di Ladan. ¹⁰Simeï teneba mas kuartu fiju: Jaat, Ziza, Jeus ku Berias. ¹¹Jaat seduba êf, ku Ziza si sugundu. Jeus ku Berias e ka teneba manga di fiju; asin e reżistadu suma un familia son.

¹²Koat teneba kuartu fiju: Anran, Izar, Ebron ku Uziel. ¹³Anran padi Aron ku Moisés. Aron i separadu, el ku si jorson pa sempri, pa purifika kusas mas sagradu, pa kema nsensu danti di SIÑOR, pa sirbil, pa bensua na si nomi pa sempri. ¹⁴Fijus di Moisés, omi di Deus, e reżistadu juntu ku jorson di Levi. ¹⁵Fijus di Moisés seduba Jerson ku Eliezer. ¹⁶Sebuel seduba êf di fijus di Jerson. ¹⁷Eliezer teneba un fiju son, ku sedu êf Reabias, ku bin padi manga di fiju.

¹⁸Izar teneba un fiju comadu Selomit, êf di familia. ¹⁹Ebron teneba kuartu fiju: Jerias ku sedu êf, dipus Amarias, Jaaziel ku Jekamean. ²⁰Fijus di Uziel seduba Mika, ku sedu êf, ku Isias.

²¹Merari teneba dus fiju: Mali ku Musi. Mali padi Eleazar ku Kis. ²²Eleazar muri oca ki ka tene fiju

macu, ma son femias, ku bin kasa ku se primus, fijus di Kis. ²³Musi padi tris fiju: Mali, Eder ku Jeremot.

²⁴Esis i êfis di jorson di Levi, konformi se familias. Elis tudu e reżistadu pa nomi. Kada kin di vinti anu di idadi pa riba i teneba si parti na tarbaju di kasa di SIÑOR.

²⁵Davi fala: “SIÑOR Deus di Israel i da diskansu pa si pobu; el propi i na mora na Jerusalem pa sempri. ²⁶Asin levitas ka na pirsisa di torna karga tenda nin kualker di kusas ku ta usadu na sirvis la.”

²⁷Konformi ultimu ordis di Davi, levitas e kontadu di idadi di vinti anu pa riba. ²⁸E nkargadu di juda jorson di Aron na sirvis di kasa di SIÑOR, di toma konta di kintal ku kuartus, di juda na purifikason di tudu kusas sagradu, suma na kualker tarbaju di kasa di Deus. ²⁹Elis ku ta toma konta di pon sagradu, di foriña finu pa ofertas di kumida, di bolaşas sin fermentu ku utru ofertas ku ta kusñadu, tambi di midi o di pesa ofertas. ³⁰E tenba ku firma pa gardisi SIÑOR, tambi pa ngabal, kada dia parmaña ku di tardi, ³¹tambi ora ku ofertas kemadu na pursentadu na dias di diskansu, na lua nobu, tambi na dias ku markadu pa festival. E tenba ku pursenta sempri danti di SIÑOR na numeru markadu, kada kin na sirvis ki skaladu pa el. ³²Asin levitas dadu kargu di guarda tenda di junta-mentu ku kau sagradu, tambi pa juda se ermons di jorson di Aron na sirvis di kasa di SIÑOR.

23.6: Kap 6.1-29 **23.13:** Sai 28.1; 29.44; 30.1,7-10; Sir 16.16-19,30-33 **23.14:** Kap 26.24-25; Sai 18.2-4
23.19: Kap 24.23-30 **23.21:** Kap 6.47; 24.26
23.29: Sai 25.23,30 **23.30:** Sai 29.39-42
23.31: Num 10.10 **23.32:** Num 1.53

Davi rapati saserdotis na grupus

24 ¹Jorson di Aron i divididu na turmas. Fijus di Aron e seduba Nadab, Abiu, Eleazar ku Itamar. ²Nadab ku Abiu muri antis di se pape, e ka fika fijus. Eleazar ku Itamar fika na tarbaju di saserdoti. ³Ku ajuda di Zadok, di jorson di Eleazar, ku Aimelek, di jorson di Itamar, Davi rapati jorson di Aron konformi dever di kada kin na sirvis. ⁴I ojadu kuma šefis di familia di jorson di Eleazar e muitu mas ciu di ki di jorson di Itamar. Asin e divididu: disaseis šef di familia di Eleazar ku oitu šef di familia di Itamar. ⁵E rapati elis pa sorti, pabia i tenba na metadi di tudu dus familia šefis di kau sagradu ku šefis di Deus.

⁶Semaias, fiju di Netanel, sekretariu levita, i skirbi se nomis dianti di rei ku šefis, saserdoti Zadok, Aimelek, fiju di Abiatar, ku šefis di familia di saserdotis (di familia di Eleazar ku Itamar), ku di levitas.

⁷Sorti paña jinti ne ordi: Jeoiarib, Jedaias, ⁸Arin, Seorin, ⁹Malkias, Miamin, ¹⁰Akoz, Abias, ¹¹Jesua, Sekanias, ¹²Eliasib, Jakin, ¹³Upa, Jesebeab, ¹⁴Bilga, Imer, ¹⁵Ezir, Apizez, ¹⁶Petaias, Jeezkel, ¹⁷Jakin, Gamul, ¹⁸Delaias ku Maazias, ku fasi elis vinti i kuartu.

¹⁹Aron, se pape antigu, i fasiba regras pa elis konformi ordi ki risibiba di SIÑOR Deus di Israel. Asin elis e fika e sigi ki regras pa yentra na kasa di SIÑOR pa fasi sirvis.

Lista di levitas

²⁰Esis i nomis di utru šefis di familia di jorson di Levi: di familia di Anran, Subael; di familia di Subael, Jedeias; ²¹Isijá i seduba šef di familia di Reabias; ²²di izaritas, Selomot; di familia di Selomot, Jaat; ²³di familia di Ebron i tenba kuartu, ku sedu Jerias, Amarias, Jaaziel ku Jekamean; ²⁴di familia di Uziel, Mika; di familia di Mika, Samir; ²⁵ermon di Mika, Isijá; di familia di Isijá, Zakarias; ²⁶fijus di Merari: Mali, Musi ku Jaazias; ²⁷di Merari, di familia di Jaazias: Benu, Soan, Zakur ku Ibri; ²⁸di Mali, Eleazar (ku ka teneba fiju) ku Kis.

²⁹Fiju di Kis: Jerameel. ³⁰Fijus di Musi: Mali, Eder ku Jerimot.

Es i sedu jorson di levitas konformi se familias.

³¹Elis tambi e juga sorti, suma ku se ermons di jorson di Aron fasi, dianti di rei Davi ku Zadok ku Aimelek, ku šefis di familia di saserdotis ku levitas. Ermon garandi di familia ku ermonsiñu e tratadu di mesmu manera.

Kantaduris

25 ¹Davi ku si šefis e kuji familias di Asaf, Eman ku Jedutun pa e juda na sirvis di kultus, pa anunsia rekadu di Deus, kumpañadu ku arpas, violas ku simbalus. Esis i nomis di jinti ku kujidu pa toma parti na ki sirvis:

24.2: Sir 10.1-2,12 **24.3:** 2 Sam 15.24

24.3: 2 Sam 8.17 **24.10:** Ne 12.4,17; Luk 1.5

24.31: Kap 25.8; 26.13 **25.1:** Kap 15.16-19

²Fijus di Asaf: Zakur, José, Natanias ku Asarela. E staba bas di se pape Asaf ku ta anunsiaba rekadu di Deus konformi ordi di rei Davi.

³Seis fiju di Jedutun: Jedalias, Zeri, Jesaias, Simei, Asabias ku Matitias. E staba bas di se pape Jedutun ku ta anunsiaba; e ta tokaba arpas pa ngaba SIÑOR, pa gardisil.

⁴Fijus di Eman: Bukias, Matanias, Uziel, Sebuél, Jerimot, Ananias, Anani, Eliata, Jidalti, Romanti-Ezer, Jobekasa, Maloti, Otir ku Maaziot. ⁵Deus, konformi si purmesa, i da Eman, anunsiatur di Deus na sirvis di rei, ki katorzi fiju ku mas tris femia, pa buril mas forsa. ⁶Elis tudu e staba bas di se pape pa tarbaja na musika di kasa di SIÑOR, ku salterius, violas ku arpas, pa kultus na kasa di Deus. Asaf, Jedutun ku Eman e staba bas di ordi di rei. ⁷Numeru delis, tudu ku se parentis ku tenba jitu, e trenadu na musika di SIÑOR, i sedu duzentus i oitenta i oitu. ⁸Jovens ku garandis, mestres ku alunus, e jugadu sorti pa se skala di sirvis.

⁹⁻³¹E divididu na vinti i kuaru grupu di dozi, kada un ku si šef nkargadu di si fijus ku parentis. Sorti sai ne ordi: José di familia di Asaf, Jedalias, Zakur, Izri, Natanias, Bukias, Jesarela, Jesaias, Matanias, Simei, Azarel, Asabias, Subael, Matitias, Jeremot, Ananias, Jobekasa, Anani, Maloti, Eliata, Otir, Jidalti, Maaziot ku Romanti-Ezer.

Guardas di porton di templu

26 ¹Utru levitas e kujidu pa sedu porterus. Meselemias, fiju di Kore, di familia di Asaf, i kujidu na jorson di koraitas. ²Meselemias teneba seti fiju: Zakarias ku padidu purmeru, dipus Jediael, Zebadias, Jatniel, ³Elan, Joanan ku Elioenai.

⁴⁻⁵Obed-Edon teneba oitu fiju pabia Deus bensual. Si purmeru fiju seduba Semaias; dipus i padi Jeozabad, Joá, Sakar, Netanel, Amiel, Isakar ku Peuletai.

⁶Si fiju Semaias i padi fijus ku tenba otridadi na familia di se pape, pabia e seduba omis di kapasidadi. ⁷Se nomis sedu: Otni, Refael, Obed ku Elzabad, ku se ermons Eliu ku Semakias, tambi omis di kapasidadi. ⁸Esis tudu e sedu di familia di Obed-Edon; elis ku se fijus ku se ermons seduba sesenta i dus omi ku kapasidadi ku forsa pa ki tarbaju.

⁹Meselemias ku si fijus ku ermons seduba disoitu omi di kapasidadi.

¹⁰Osa, di familia di Merari, i pui si fiju Sinri pa i sedu šef, mesmu ki ka sedu purmeru fiju. ¹¹I padi tambi Ilkias, Tebalias ku Zakarias. Tudu fijus ku ermons di Osa e sedu trezi.

¹²Porterus divididu na grupus, konformi se šefis. E dadu kargu di tarbaju na kasa di SIÑOR, suma se ermons. ¹³Sorti jugadu pa šefis di familia, garandis ku jovens, pa kada porton.

¹⁴Sorti di porton di lesti i paña Selemias. Dipus e juga sorti pa si

fiju Zakarias ku sedu omi ku ta da bon konsiju; i paña porton di norti. ¹⁵Obed-Edon paña di sul; si fijus e paña kargu di guarda armazen. ¹⁶Supin ku Osa e paña portons di kaida di sol ku porton di Saleket, lungu di kamiñu di riba. Un guarda ta rindi si kumpañer. ¹⁷Seis levita ta staba na porton di lesti kada dia, kuartu kada dia na porton di norti, ku kuartu kada dia na porton di sul. Na armazen e ta staba dus dus na sirvis. ¹⁸Na kintal, pa ladu di kaida di sol, i tenba kuartu guarda lungu di kamiñu ku dus dentru di kintal.

¹⁹Esis i grupus di porterus kujidu di familia di koraitas ku familia di Merari.

Guardas di rikesas

²⁰Utru levitas tenba konta di rikesas di kasa di Deus ku armazens di ofertas sagradu. ²¹Ladan, di familia di Jerson, i seduba șef di familia di si fiju Jeieli. ²²Fijus di Jeieli, Zetan ku Joel, e tenba kargu di rikesas di kasa di Deus.

²³Kargu i dadu tambi pa omis di familias di Anran, Izar, Ebron ku Uziel.

²⁴Sebuel, di familia di Jerson, fiju di Moisés, i seduba șef di rikesas. ²⁵Eliezer, ermon di Jerson, i padi Reabias, pape di Jesaias, pape di Joran, pape di Zikri, pape di Selomit. ²⁶E Selomit ku si parentis e nkargadu di guarda ofertas sagradu ku rei Davi, ku șefis di familia, ku kapitons di mil ku di sen, ku utru șefis di tropa, dedika pa Deus, ²⁷pabia e tira utru parti di kusas ke toma na gera, e dedikal pa i usadu na kasa

di SIÑOR. ²⁸Tudu ku anunsiadur Samuel dedika, ku Saul, fiju di Kis, ku Abner, fiju di Ner, ku Joab, fiju di Zeruaia, es tudu staba guardadu na mon di Selomit ku si parentis.

Administraduris ku juisis

²⁹Kenanias ku si fijus e kujidu na metadi di izaritas, e pudu riba di Israel pa tarbaju fora di templu, pa sedu administraduris ku juisis.

³⁰Asabias ku si parentis, mil i setsentus omi di kapasidadi, e kujidu na metadi di ebronitas, e dadu kargu administrativu na Israel, na ladu di Jordon pa kaida di sol, pa tudu tarbaju di SIÑOR ku sirvis di rei. ³¹Jerijá seduba șef di ebronitas. Na anu 40 di renansa di Davi, jinti buska na reżistu di familias di ebronitas; i ojadu na se metadi omis di kapasidadi ku staba na Jazer na tera di Jilead. ³²Rei Davi kuji Jerijá ku dus mil i setsentus di si parentis, omis di kapasidadi, șefis di familia, i pui elis suma administraduris riba di rubenitas, gaditas ku metadi di jorson di Manasés, pa e trata di kusas di Deus ku kusas di rei.

Grupus di tropas

27 ¹Es i lista di șefis di familia di Israel, kapitons di mil ku di sen, ku administraduris ku ta sirbiba rei. Kada mis di anu, un grupu di 24.000 omi ta yentraba pa tarbaja pa un mis; dipus i ta sai; utru grupu ta yentra.

26.20: Kap 9.26-29; 28.12; Ne 10.38; Mal 3.10

26.31: Num 32.1

- ² Jasobean, fiju di Zabdiel, i staba riba di purmeru grupu di 24.000 ku yentra na purmeru mis. ³I seduba di familia di Perez, i staba riba di tudu kapitons di tropa pa ki purmeru mis.
- ⁴ Dodai, aoita, i staba riba di grupu di 24.000 pa sugundu mis. Miklot seduba sugundu sêf na grupu.
- ⁵ Riba di grupu di 24.000 pa terseru mis i staba Benaia, sêf di tropas, fiju di saserdoti Jeoiada. ⁶Es i ki Benaia ku tenba fama na metadi di ki trinta, ku bin sedu se sêf. Si fiju Amizabad i seduba sugundu sêf di si grupu.
- ⁷ Asael, ermon di Joab, i staba riba di grupu di 24.000 pa kuartu mis. Si fiju Zebadías i toma si lugar.
- ⁸ Samut, israita, i seduba sêf riba di grupu di 24.000 pa kintu mis.
- ⁹ Ira, fiju di Ikes, di Tekoa, i staba riba di grupu di 24.000 pa sestu mis.
- ¹⁰ Elez, pelonita, di jorson di Efrain, i staba riba di grupu di 24.000 pa setimu mis.
- ¹¹ Sibekai, di Usa, di familia di zeraitas, i staba riba di grupu di 24.000 pa oitavu mis.
- ¹² Abiezer, di Anatot na tera di Benjamin, i staba riba di grupu di 24.000 pa nonu mis.

- ¹³ Maarai, netofatita, di familia di zeraitas, i staba riba di grupu di 24.000 pa desimu mis.
- ¹⁴ Benaia, piratonita, di jorson di Efrain, i staba riba di grupu di 24.000 pa mis di 11.
- ¹⁵ Eldai, netofatita, di familia di Otniel, i staba riba di grupu di 24.000 pa mis di 12.

Administraduris di jorsons

¹⁶⁻²² Esis i administraduris ku staba riba di jorsons di Israel:

Riba di rubenitas:	Eliezer, fiju di Zikri;
riba di simeonitas:	Sefatias, fiju di Maaka;
riba di levitas:	Asabias, fiju di Kemuel;
riba di aronitas,	Zadok;
riba di Judá:	Eliu, ermon di Davi;
riba di Isakar:	Onri, fiju di Mikael;
riba di Zebulon:	Ismaias, fiju di Obadías;
riba di Naftali:	Jerimot, fiju di Azriel;
riba di Efrain:	Oseias, fiju di Azazias;
riba di metadi di Manasés:	Joel, fiju di Pedaias;
riba di utru metadi di Manasés, na tera di Jilead:	Idu, fiju di Zakarias;

27.5: 2 Sam 8.18 **27.7:** 2 Sam 2.18 **27.9:** 2 Sam 20.26
27.11: 2 Sam 21.18 **27.12:** 2 Sam 23.26-30
27.21: 1 Sam 14.50

riba di Benjamin: Jaasiel, fiju di Abner;
 riba di Dan: Azarel, fiju di Jeroan.

Esis i administraduris di jorsons di Israel.

²³Davi ka reŕista nomis di omis ku ka cigaba inda vinti anu, pabia SIÑOR falaba kuma i na buri Israel pa e ciu suma strelas di seu. ²⁴Joab, fiju di Zeruia, i kumsaba toma numeru di jinti, ma i ka bin kabantal, manera ku raiba duru kai riba di Israel pabia di ki resensiamentu. E ku manda numeru kompletu i ka bin pudu na libru di reŕistu di rei Davi.

Administraduris di rei

²⁵Azmavet, fiju di Adiel, seduba responsavel di armazens di rei.

Jonatas, fiju di Uzias, seduba responsavel di armazens di pontas, di prasas, tabankas ku toris di bisia.

²⁶Ezri, fiju di Kelub, seduba responsavel di tarbaju di pontas ku labur.

²⁷Simei di Ramá seduba responsavel di ortas di uva.

Zabdi, sifmita, seduba responsavel di uvas ku ta bai pa armazens di biñu.

²⁸Baal-Anan di Jeder seduba responsavel di ortas di olivera ku figera brabu ku staba na kampadas.

Joás seduba responsavel di armazens di azeiti.

²⁹Sitrai, saronita, seduba responsavel di limarias ku ta bakiaduba na Saron.

Safat, fiju di Adlai, seduba responsavel di limarias ku staba na kobons.

³⁰Obil, ismaelita, seduba responsavel di kamelus.

Jedeias, meronotita, seduba responsavel di burus.

³¹Jaziz, agrita, seduba responsavel di karnel ku kabras.

Esis tudu seduba administraduris di rikesa di rei Davi.

³²Jonatas, tiu di Davi, i seduba omi jiru ku ta daba bon konsiju, ku kunsiba letras diritu. Jeiel, fiju di Akmoni, i seduba nkargadu di edukason di fijus di rei.

³³Aitofel seduba konsijadur di rei.

Usai, arkita, i amigu di rei.

³⁴Dipus di mortu di Aitofel, Jeoia-da, fiju di Benaia, ku Abiatar, e toma si lugar. Joab seduba ŕef di tropas di rei.

Davi da ordi aserka di templu

28 ¹Davi coma tudu ŕefis di Israel pa e junta na Jerusalem: administraduris di jorsons, ŕefis di grupus ku ta sirbi rei, kapitons di mil ku di sen, administraduris di rikesas ku limarias di rei ku di si fijus, suma tambi funsionarius di palasiu ku ŕefis di tropa.

²Rei Davi lanta, i firma, i fala: “Ña ermons ku ña pobu, bo sukutan. N sintiba na ña korson pa kumpu un kasa di diskansu pa arka di kontratu di SIÑOR, nunde ku no Deus tambi pudi diskansa si pe. N

27.23: Kum 15.5 27.24: Kap 21.1-27

27.33: 2 Sam 15.12 27.34: Kap 11.6

28.2: 2 Sam 7.2 28.2: Kap 18.7-11

purpara ja kusas pa kumpul, ³ma Deus falan: ‘Bu ka na kumpu kasa pa ña nomi, pabia bu sedu omi di gera, bu darma sangi ciu.’ ⁴SIÑOR Deus di Israel i kujin na metadi di tudu familia di ña pape, pa N sedu rei riba di Israel pa sempri. I kuji Judá pa i sedu jorson di renansa; na familias di Judá i kuji familia di ña pape. Deus, na si vontadi, i kujin na metadi di ña ermons pa fasin rei riba di tudu Israel. ⁵SIÑOR patin manga di fiju. Na metadi delis tudu i kuji ña fiju Salomon pa i sinta na tronu di renansa di SIÑOR riba di Israel. ⁶SIÑOR falan: ‘Salomon bu fiju, el ku na kumpu ña kasa ku ña barandas, pabia N kujil pa i sedu ña fiju; ami N ta sedu si pape. ⁷N na firmanta si renansa pa sempri, si el i kontinua na obdisi ña mandamentus ku ña leis, suma ki na fasidu ne dias.’

⁸“Asin, danti di tudu Israel, ku sedu juntamentu di SIÑOR, danti di no Deus ku sta li pa obinu, N na konta bos pa bo pui sintidu pa obdisi tudu mandamentus di SIÑOR bo Deus, pa bo pudi sedu dunu de bon tera, bo pasantal suma yardansa pa bo jorson dipus di bos pa sempri.

⁹“Abo Salomon, ña fiju, rikuñisi Deus di bu papes, bu sirbil ku tudu bu korson, ku pruntidon di spiritu, pabia SIÑOR ta rabista tudu korson, i ta kungsi tudu motivu

ku sta tras di kada pensamentu. Si bu buskal bu na ojal, ma si bu disal, i na negau pa sempri. ¹⁰Pa kila, toma sintidu, pabia SIÑOR kujiu pa bu kumpu kasa pa i sedu kau sagradu; pega tesu bu fasil.”

Davi da Salomon planta di templu

¹¹Davi da si fiju Salomon planta di baranda ku kasas, armazens, kuartus di riba ku kuartus di dentru, suma tambu kau mas sagradu pa arka. ¹²I dal tambu planta di tudu ki teneba na sintidu aserka di kintal di kasa di SIÑOR, ku tudu kuartus na roda, ku armazens di kasa di Deus, ku armazens pa ofertas sagradu. ¹³I mostral tambu si planus pa grupus di saserdotis ku levitas, ku tudu tipu di sirvis na kasa di SIÑOR, ku tudu material ku na usadu na sirvis di templu. ¹⁴I splikal aserka di pesu di uru ku prata ku dibi di usadu pa kumpu kusas pa sirvis di kasa di Deus: ¹⁵pesu di kada kanderu di uru ku si pe; pesu pa kanderus di prata; ¹⁶pesu di uru pa kada mesa di pon sagradu; pesu di prata pa mesas di prata; ¹⁷pesu di uru puru pa garfus, basias, jarus ku tiželas; pesu di prata pa kada tižela di prata, ¹⁸ku pesu di uru purifikadu pa altar di nsensu, suma tambu pa modelu di karu pa kirubins ku ta distindi se asas pa kubri arka di kontratu di SIÑOR.

¹⁹Davi fala: “SIÑOR dan ntindimentu di si ordis aserka di pormenoris de modelu ku sta li skritu.”

28.3: Kap 17.4; 1 Re 5.3 **28.4:** 1 Sam 16.6-13

28.4: Kap 5.2; Kum 49.10 **28.5:** Kap 22.9-10

28.6: Kap 17.11-14 **28.8:** Lei 4.40 **28.11:** Sai 25.40

28.17: 1 Sam 2.13-14; 1 Re 7.45-50 **28.18:** Sai 30.1-10

28.18: Sai 25.17-20

²⁰Davi fala si fiju Salomon: “Sedu forti, bu ten koražen, bu fasi tarbaju. Ka bu medi, nin ka bu disanima, pabia SIÑOR Deus, ña Deus, i sta ku bo. I ka na disau, nin i ka na bandonau, tok bu kaba tudu tarbaju pa sirvis di kasa di SIÑOR. ²¹Grupus di saserdotis ku levitas e sta pruntu pa tudu tarbaju di kasa di Deus. Omis ku tudu koldadi jitu e sta li ku vontadi pa judau. Tudu šefis tambi, ku tudu pobu, e na obdisi bu ordi.”

Ofertas pa kumpu templu

29 ¹Rei Davi fala tudu juntamentu: “Ña fiju Salomon i kil ku Deus kuji, ma i nobu inda, i ka ten spiriensia. E tarbaju i garanti, pabia i ka palasiu pa omi, ma i templu pa SIÑOR Deus. ²Ami, ku tudu ña forsa, N purpara material pa kasa di ña Deus: uru pa kumpu kusas di uru, prata pa kusas di prata, suma tambi kobri, feru ku madera, ku tudu koldadi joia bonitu di balur, ku pedra finu ku marmori, manga del. ³Fora di tudu ku N purpara ja pa kau sagradu, N na da uru ku prata di mi propi, pabia di amor ku N ten pa kasa di ña Deus. ⁴N da sen tonolada di uru di Ofir, ku duzentus i korenta tonolada di prata purifikadu pa kubri paredis di kasas, ⁵tambi pa kusas di uru ku di prata ku artistas na bin kumpu. Aos, kin ku sta pruntu pa inci mon, pa da oferta pa SIÑOR?”

⁶Asin, šefis di familia, administraduris di jorsons di Israel, kapitons di mil ku di sen, ku šefis di tarbaju di rei, e da oferta ku vontadi. ⁷E da

pa tarbaju di kasa di Deus 170 tonolada ku mas 84 kilu di uru, 345 tonolada di prata, 610 tonolada di kobri ku 3.450 tonolada di feru. ⁸Kilis ku teneba pedras di balur e ntrega na armazen di kasa di Deus, na mon di Jeiel, jersonita. ⁹Pobu fika kontenti manera ke da ku bon vontadi, pabia e da oferta pa SIÑOR ku tudu korson. Rei Davi tambi i sinti garandi kontentamentu.

Davi ngaba Deus

¹⁰Davi ngaba SIÑOR dianti di tudu juntamentu, i fala:

“O SIÑOR,

Deus di no pape Israel,
bu ta ngabadu,
antis di kumsada, pa sempri.

¹¹Abo, SIÑOR, i garandi;
bu ten puder

ku rispitu ku vitoria;
abo i Rei gloriosu.

Tudu ku sta na seu
ku tera i di bo.

Renu i di bo, SIÑOR; abo
i kabesa ku sta riba di tudu.

¹²Rikesa ku gloria bin di bo;
i abo ku ta manda
riba di tudu.

Forsa ku puder
sta na bu mon;

bu pudi da garandesas
ku forsa pa tudu jinti.

28.20: Kap 22.13; Jos 1.5; Eb 13.5 **28.21:** Sai 35.25-26, 35; 36.1-4; Titu 3.1 **29.1:** Kap 22.5; 1 Re 3.7

29.2: Kap 22.3-5,14-16; Ekl 9.10 **29.2:** Sai 28.17-20; Is 54.11-12; Apok 21.18-21 **29.4:** 1 Re 9.28

29.5: Sai 25.2-9; 35.5 **29.9:** 2 Kor 8.3-5; 9.7

29.11: Ne 9.5; Sal 21.13; Dan 4.30,34-35; 6.26; 1 Tim 1.17; 6.15-16; Jud 25; Apok 4.11; 5.12; 7.10 **29.12:** Lei 8.18;

Jo 42.10; Rom 11.35-36 **29.12:** Mat 28.18; Apok 11.17 **29.12:** Sal 18.32; 68.35; 144.1-2; Is 40.29; Fil 4.13; Kol 1.11

¹³ Aos, no Deus,
no falau obrigadu,
no ngaba
bu nomi gloriosu.

¹⁴ “Anos i kin, ami ku ña pobu, pa no pudi dau tudu e kusas di bon vontadi? Tudu bin di bo; no dau son kil ku bin di bu mon. ¹⁵ Anos i stranjerus bu danti, ospris suma ku tudu no papes seduba. No vida ne mundu i ta pasa suma sombra; no ka ten speransa di fika li. ¹⁶ O SIÑOR no Deus, tudu e rikesa ku no junta pa kumpu kasa pa bu nomi sagradu, i bin di bo, i di bo tudu. ¹⁷ Ña Deus, N sibi sertu kuma bu ta proba korson di jinti, bu ta kontenti si bu oja bardadi nel. Ami tambi, N dau tudu e kusas ku sinseridadi di ña korson, ku tudu ña vontadi. Gosi N sta kontenti pa oja manera ku bu pobu ku sta li e dau ku tudu vontadi. ¹⁸ SIÑOR Deus di no papes Abraon, Isak ku Israel, guarda e bon disežu na korson di bu pobu pa sempri, bu gia se korson son pa bo. ¹⁹ Pui ña fiju Salomon pa i dija ku tudu si korson obdisi tudu bu mandamentus, leis ku ordi, pa i pui sintidu pa kumpu e templu ku N purpara ja kusas pa el.”

²⁰ Dipus Davi fala tudu junta-mentu: “Bo ngaba SIÑOR bo Deus!” Asin tudu pobu mborka danti di

SIÑOR, tambi danti di rei, e ngaba SIÑOR Deus di se papes.

²¹ Sol mansi; e sakrifika limarias pa SIÑOR, e pursental ofertas kemadu: mil turu, mil karnel macu ku mil karnelsiñu, tudu ku se oferta di bibida. E sakrifika manga di limaria pa tudu Israel. ²² Ki dia e kume e bibi danti di SIÑOR ku garandi kontentamentu.

E rikuñisi Salomon, fiju di Davi, pa sugundu bias suma rei, e unjil danti di SIÑOR suma se šef. E unji tambi Zadok pa i sedu saserdoti. ²³ Asin Salomon sinta na tronu di SIÑOR na lugar di si pape Davi. Kusas kuril diritu; tudu Israel obdisil. ²⁴ Tudu administraduris ku tropas, ku tudu fijus di rei Davi, e jurmenta kuma e na fika bas di rei Salomon.

²⁵ SIÑOR garandisi Salomon na uju di tudu Israel, i dal gloria na si renansa, ku nin utru rei na Israel ka teneba antis del.

Mortu di Davi

²⁶ Davi, fiju di Jesé, i rena riba di tudu Israel ²⁷ pa korenta anu — seti anu na Ebron ku trinta i tris na Jerusalem. ²⁸ I muri na bon bejisa, oca ki kompleta si dias; i goza rikesa ku rispitu. Si fiju Salomon bin rena na si lugar.

²⁹ Tudu ku pasa na vida di rei Davi, disna di kumsada te na kabantada, i sta skritu na librus di Storia di anunsiaduris Samuel, Natan ku Gad. ³⁰ Ki librus ta konta di si renansa ku si puder, ku tudu kusas ku pasa ku el, ku Israel ku tudu renus na si roda.

29.15: Eb 11.13-16; 1 Ped 2.11 29.15: Tia 4.14

29.17: Kap 28.9; Apok 2.23 29.17: Dit 11.20

29.20: Kap 16.36; 2 Kron 20.21 29.22: Kap 23.1

29.23: Kap 17.11-12; 28.5; Sal 132.11; Is 9.6-7

29.23: Kap 22.11 29.25: 2 Kron 1.12

29.28: Kum 25.8; 35.29